

東  
華  
續  
錄

東華續錄

同治二十八

臣王先謙敬編

臣張式恭恭校

十一月甲辰朔諭議政王軍機大臣等吳棠奏捻股西竄曹單派隊跟追並官軍連破蒙東賊壘閻敬銘奏南捻蠢動勢難分兵赴皖各一摺南捻項盤劉全李大箇子由豐縣擾及山東之金鄉單縣嶧縣城武等處旋由西南各路回竄碭山一帶見在東境雖已無匪蹤惟南捻屢由金鄉等縣北犯已成該逆熟徑難保不再圖回竄著吳棠閻敬銘督飭兩省官軍會同進剿務將此股殲除淨盡不得以賊匪業經擊退即可卸責也見在東省勇丁既據閻敬銘奏稱所畱無多卽著無庸抽調赴皖助剿其遣撤歸農之勇丁能否散而不聚有無後患著閻敬銘體察妥爲辦理毋令日後滋

生事端所練馬隊並著該署撫督飭丁寶楨挑選額兵配騎操演務使認真訓練不可有名無實蒙城官軍已將正西及西南東南三面賊營包圍陳國瑞見派遊擊李坤等在蒙南紮營一座擬再添營兩座四面長圍漸合著吳棠督飭陳國瑞將蒙南營壘趕緊築成我軍一經合圍則賊之糧運卽斷攻剿自易得手僧格林沁已抵亳州卽日進兵剿苗國瑞馬隊已由徐赴宿各該營餉需並著吳棠隨時接濟僧格林沁旣已抵皖所有該省軍情及應行請獎人員著吳棠知會富明阿嗣後均由該親王陳奏以一事權將此由五百里各諭令知之○諭前因毛震壽奏陳漢南銀窘情形請於川省借地抽取鹽釐濟餉當經諭令駱秉章按照所奏籌辦嗣因劉蓉奏稱川省鹽釐應由井竈抽收復經諭令駱秉章酌量辦理茲據駱秉章奏稱川省鹽釐疊經酌定稅則在渝城並富榮

健樂等廠設局分按斤包水引抽取自滇匪闖入後塞井夷竈陝商在川貿易者多將貲本運回原籍復被陝回焚掠至今尙未全行復業兼以淮運已通楚鹽價減川商無利可圖請免于再抽陝省加半鹽釐等語自係爲體恤商情起見惟前據劉蓉奏稱川省各廠鹽筴之利井竈實居其源而商販特承其流擬就井竈起課按鍋計鹽按鹽定釐是駱秉章所謂鹽釐者係就商運之鹽分別按計斤包引數抽收劉蓉所謂鹽釐者係就井竈按鍋計鹽抽收辦法本有不同見在川省商力雖疲而各處銷鹽之路尙無阻滯劉蓉前任川藩一載有餘所擬由井竈抽釐之法自必確有所見著駱秉章仍按該撫原奏悉心妥籌覈實定議具奏以裕度支而資餉源將此諭令知之○乙巳李鴻章奏臣周厯蘇州省城東南北各門察看形勢太湖之水由胥口鮎魚口流入胥盤兩門外繞

至婁門齊門大河如帶橫豎三四道環衛城垣該逆憑河築長城周圍十餘里槍眼礮臺層層密布長城內石壘土營數十座南自盤門北至婁門聯絡扼紮牆內多穴地爲屋堆土覆板於其上以避開花礮布置極爲嚴整而婁門外石壘長城尤高且堅程學啟所部各營與之隔河對壘已踰兩月屢攻不下賊之精銳盡聚於是臣與程學啟戈登等再四籌商須先設法攻破此處使該逆藩籬盡失我軍乃可直抵城下十月十六夜四鼓各軍銜枚而進月霧迷茫中偷搭浮橋該逆已有防備伏垛開槍子密如雨戈登帶隊衝入炸礮火箭迸發賊於暗地藏避抵死對擊傷我弁勇數十名斃洋兵頭目數人程學啟大呼猛撲萬槍排放殪賊無數而守垛悍逆寂然不動天已嚮明仍各撤回戈登約於十九日調齊炸礮二十餘尊合力攻打探知僞忠王李秀城因我軍攻勦緊急十

八日出望亭帶悍逆千餘繞路入城協守十九日程學啟督所部各隊緣南岸進戈登督常勝軍緣北岸進臣在望樓高處督戰該逆旗幟布滿戈登督率弁兵排列開花礮位對準轟擊自辰至午長城堅壘土石亂飛塌缺十餘處守壘之賊當之輒碎餘均伏地窟中程學啟戈登帶隊乘勢搭橋過河忽忠逆暮逆率死黨萬餘人出城湧至助守營牆程學啟揮令王永勝等四路越濠齊進逆勢稍卻戈登帶奮勇槍隊肉薄以登立將長城攻破壘賊惶遽各軍分投攻奪忠逆大隊併力衝突程學啟督軍鏖戰逾時該逆狂奔入城陳東友水師復登岸夾擊所有隻門賊壘二十餘座次第燒毀擇其衝要者分兵駐守是役也弁勇傷亡五百餘人斃賊五六千人二十日齊門外賊營四座知東門長城已破官軍偪紮自相驚擾黃翼升等乘勢蹙之亦潰入城其盤門外賊營經李朝斌

等水陸各軍於十二日攻克我軍收隊後賊復填紮臣飛調駐守西塘之總兵楊鼎勳選帶洋槍隊千人前來助攻十九日楊鼎勳率同副將尹連陞等會合水師攻撲尹連陞拔椿踰濠中礮死之二十日李朝斌楊鼎勳等督軍猛進賊潰追至城根擒殺頗多又踏毀賊壘四座此連日攻克婁齊葑盤四門外賊壘長城之實在情形也臣查蘇州省城賊屢挫勢已窮蹙但恃城外大河長牆堅壘爲憑依之固我軍礮火雖多難以偪城轟打幸賴將士用命齊心血戰立破長城石壘多座於是東南北三面我軍可徑抵城下賊膽已寒頗有逆酋乞爲內應者臣暫給諭招撫督同程學啟妥籌辦理惟蘇州爲忠逆巢穴志在死守仍欲出擾我軍後路圖解重圍城內精壯老弱聞有十萬餘人無路能逃不得不爲圍獸之鬪臣惟謹慎戒備一面督軍乘勝攻擊以冀早克省垣仰慰 慈

廬總兵銜儘先副將尹連陞力戰傷亡應懇恩飭部照總兵陣亡例從優議卹又奏無錫各軍乘勝偪剿十月十六日李鶴章令張樹聲周盛波等由鴨城橋進扼東面城根直抵附城三里街前該處賊卡多座伏賊數百名我軍以小隊攻撲賊出卡抵拒片時卽潰各軍分投築壘一面排隊備禦午刻賊突出二百餘名各路奮擊鏖戰兩時斃賊匪多名始復潰退薄暮又出黑龍旗數十面專帶洋槍六七百桿越河來撲勢極兇悍張樹珊躍馬大呼衝入賊陣張樹聲從旁夾擊劉銘傳周盛波兩路追剿槍斃無算各營均於東門外二三里內紮定劉銘傳所部四千餘人原紮青陽至西高山自初五日該鎮親帶千人赴東路合剿其原營軍務暫令縣丞刁祖薌主守刁祖薌以萬壽橋踞賊偪近恐其偵我分隊遠出乘虛來攻不如先發制之適連朝大霧遂於十五日早出四營



隊伍乘賊不意連毀橋南北賊營三座擒斬百餘名仍於霧中四伏疑兵掌號放槍以小隊次第進擊比及霧散賊壘數十座已驚潰一空俱退往斗門一帶屯踞萬壽橋爲進兵高橋要路遂抽隊守之見錫城東面已無賊營南北爲高橋及望亭兩處賊壘林立劉銘傳擬進攻高橋直偪城北李鶴章派郭松林六營暫作遊擊之師相度賊勢再圖合圍上諭議政王軍機大臣等李鴻章親督程學啟戈登等各軍奮力猛攻將各門外長城十餘里賊壘二十餘座全行攻毀東南北三面我軍已可徑抵城下賊膽已寒惟蘇州爲忠逆巢穴志必死守城內賊眾尙十餘萬無路逃生不得不爲困獸之鬪且恐忠逆詭詐仍欲出擾我軍後路圖解重圍著李鴻章督飭各軍乘勝轟打當茲功在垂成尤應嚴密戒備不可稍設疏懈以策萬全城中逆酋乞爲內應未知是否可信李鴻章

督飭程學啟等妥籌辦理毋稍大意無錫各軍乘勝偏剿李鶴章  
劉銘傳等復將附城三里街及萬壽橋賊壘數十座全行擊潰錫  
城東面已無賊營南北惟高橋及望亭兩處賊壘林立卽著李鴻  
章督飭李鶴章劉銘傳等速卽進攻高橋直逼城下仍將郭松林  
等遊擊之師相機調度力圖合圍務使蘇錫兩城之賊不能相顧  
官軍得以早復名城同膺懋賞實殷厚望將此由六百里諭令知  
之○唐訓方奏逆匪於蚌埠水陸拒守我軍屢攻未克已掘長濠  
困之而後路湖溝以西各圩間有反正之機若非臨以兵威仍恐  
觀望不前臣於十月十九日馳回臨淮札調陳松一營進紮湖溝  
使附近各圩知所畏懾黃開榜新辦礮划百隻本欲撥赴臨淮助  
剿因邳宿一帶捻匪蠢動經吳棠截畱防剿幸提督李世忠派來  
礮船三十隻合之臨淮舊有之船尙敷守禦旋接李世忠咨稱十

月初三日攻克柏圩之後旬日之間共破壽州附近賊圩四十一座擒斬萬餘人並得糧三千餘石該提督此次進兵甚屬奮勇見仍催令速進爲擣穴焚巢之計至蒙城各軍疊據英翰稟稱自初十以後連日移軍自西而南並隨同將軍富明阿馬隊衝賊糧路疊有斬獲又據陳國瑞函稱該城東南李圩爲賊屯糧之所該鎮督軍將李圩南北七壘攻克惟李圩圍困未下連日移營正南斷其糧道與西南英翰各營相連已成合圍之勢臣查圍蒙之賊見經官軍斷其水陸糧道遠近各圩兼聞格林沁將至懾於軍威盡思返正剿辦較易爲力臣仍督飭前敵諸軍圍攻蚌埠以圖懷遠上諭蚌埠懷遠爲蒙壽兩城適中扼要之區非速行攻拔不能斷蒙壽兩處逆匪聲援見當蚌埠攻剿喫緊之際該撫遽行回駐臨淮恐前敵諸軍因此鬆勁湖溝地方既有陳松一營由固鎮

移紮該處足資防禦該撫俟辦理反正各圩已有頭緒後仍當親往蚌埠督飭前敵各軍將該圩速行攻拔以便進克懷遠不可坐失事機李世忠一軍屢克賊圩多處前因其距壽州城外僅十餘里諭令曾國藩飭令該提督將壽州速行攻拔並飭蔣凝學成大吉各軍會合進攻復據富明阿奏稱已咨該提督令其進取下蔡力圖苗逆老巢此次該撫所奏亦有函催該提督速進爲擣穴焚巢之計見在李世忠應否先取壽城或越過壽城先擣下蔡老巢之處著唐訓方商同該提督斟酌辦理總須顧定後路勿爲匪眾鈔襲方爲妥善將此由五百里諭令知之○子江蘇陣亡副將尹連陞祭葬世職○撥湖北江漢關銀三萬兩濟安徽臨淮軍需○丙午諭議政王軍機大臣等王明等奏盜匪回竄吉林長春廳屬之靠山屯等處仍催兵追剿一摺據稱該匪竄至梨樹城肆擾後

齊秀等竄回江東滾地雷王五等竄至吉林之靠山屯等處地方約有五六百人景綸等已派兵役四百名馳往防剿王明前調官兵二千餘名亦已陸續前赴如果匪徒僅止五六百人王明所派官軍已數千人諒茲小醜不難剋日殲除惟王明所派帶兵之員係屬何人未據陳奏儻將領不得其人則散而無紀何能得力著王明等於該處品級較大各員遴選知兵能戰者將調派各兵交其統帶迅催星夜趕赴賊眾處所奮力進剿儻派出之員帶隊不力觀望遷延或遇賊卽潰卽者嚴參懲辦盛京爲根本重地平日參養兵丁坐耗餉糈及匪黨竊發任令肆意侵擾毫無阻遏該將軍等自問當得何罪該匪已竄吉林所屬地方著景綸嚴催何常常喜等遇賊卽擊與盛京派出各軍合力兜擊就地殲除毋稍大意吉林兵數較單仍著王明等飭令兵弁會合追捕不得稍分畛

域致誤事機寶善早經啟程著卽星馳前進將勦匪一切事宜會同王明等妥籌辦法毋稍稽延將此由五百里各諭令知之○唐訓方奏蚌埠地方濱臨淮河爲進攻懷遠之要隘苗沛霖派死黨張士端率眾逾萬於蚌埠南北兩岸築壘拒守阻我進兵之路當飭總兵王才秀張得勝等軍刀路前進將賊壘包鈔復飭統帶水師副將劉明典等會同陸隊晝夜環攻一面趕將長濠挑成絕賊運糧採薪之路適江南提督李世忠派李顯爵統帶礮艇亦於十月二十二日駛到協力轟擊該逆屢次出撲均經官軍擊退各圩練總先經臣福加開導相率歸誠莫肯助逆張士端見眾心渙散我軍又層層包圍自知力不能支卽託圩民代求已革知縣英俊轉稟情願獻出蚌埠藉圖自贖臣令代稟人等諭以如能於獻出蚌埠後再將懷遠縣城獻出方准收撫旋據張士端密稟城中練

總業已密商允協惟苗逆因大兵猛攻蚌埠添派心腹小隊八百名分布懷遠四門守備甚嚴乞我軍讓出一路俾先率眾佯敗退回城中俟官兵一到卽令帶回人眾反攻內應等語臣揣其情勢尙非詭計當於二十五日酉刻先將南岸西面營盤暫令移併空出兩營張士端見我軍移動水陸逆眾隨卽向西狂奔當飭各軍勿追以堅其信立將南北岸大小兩蚌埠地方收復二十六日臣趕赴前敵是夜親督水陸各軍銜枚疾進黎明直薄懷遠城下賊不虞官軍驟至倉猝登陴臣正揮眾攻撲聞適李世忠親率李顯發李顯安等馬步數千星夜馳到會合夾擊忽聞城內人聲鼎沸城牆站立之人慌亂返顧臣知內應已成卽飭我軍併力仰攻逆眾大亂忽見東門驟開王才秀英俊卽率領兵勇冒險衝入適張士端趕至涕泣跪接據稱苗逆小隊先已殺斃三百餘名臣督飭

將士整隊入城搜捕逆黨淨盡當將城池收復查懷遠一城形勢  
最居險要苗逆倡亂之始首先占踞其計甚狡今幸脅從解散酋  
首輸誠立將要隘城池先後收復從此妥籌攻守實足上握蒙壽  
樞紐下爲清淮屏藩查張士端從前勦擒出力歷保花翎都司並  
加勇號繼從逆拒官此次獻隘殺賊接應官軍立將縣城克  
復實能懾服逆立功合無籲懇 皇上天恩俯准賞復張士端原官  
勇號花翎以遊擊儘先補用以爲首先投誠立功者勸已革同知  
銜懷遠縣知縣英俊素爲民情所愛戴此次實力勸導且隨同弁  
勇首先進城實屬著有勞績擬請開復原官原銜至勦辦尤爲出  
力之總兵王才秀朱淮森擬請以總兵遇缺卽補並加提督銜何  
紹彩擬請遇有提督缺出請旨簡放又遇缺提奏提督張得勝李  
顯發李顯爵官職較大均懇 天恩逾格獎勵其餘在事出力員



弁可否容臣擇尤保奏出自聖主恩施上諭懷遠一城東據臨淮上游西爲壽州下蔡正陽等處門戶西北由渦河直達蒙城最關險要苗逆自占踞該城後率眾逾萬於蚌埠南北兩岸拒守阻官軍進取之路經唐訓方調派水陸各軍層層圍裹賊勢不支逆黨張士端窮蹙求撫先後將蚌埠要隘及懷遠縣城獻出唐訓方見已督帶將領整隊入城其尤爲出力各員均照所請先予獎敘惟張士端係苗逆死黨屢抗官軍前經降旨革職儻能悔過自新擒斬苗逆方准開復今力竭勢窮始行反正城雖獻而首逆未除未便遽准開復原官念其獻出城隘尙知順逆降旨先行賞給遊擊銜仍著唐訓方用爲前隊嚮導官軍攻取苗逆老巢若能使元兇授首自當格外施恩准予開復李世忠聞知蚌埠收復卽親率李顯發等馳赴懷遠會合夾擊剿辦甚覺奮勉見在懷城已克

李世忠一軍應否進攻壽州抑或直擣下蔡著僧格林沁曾國藩商同唐訓方等酌量調遣毋誤事機臨淮一帶水師見在作何布置如淮流尚未枯涸唐訓方應督飭礮船由懷遠沂流而上南可以攻取正陽壽州斬關奪隘北可以攻取下蔡老寨埽穴擒渠惟當與李世忠所部水陸並進使該逆應接不暇諒不難剋日殲除蒙城糧食將盡危迫萬分所存小澗集雜糧前據富明阿奏礮船既不能運送開挖地道又徒勞無功半月以來城中情形若何聲息能否相通朝廷實深廛念苗練回撲蒙城時馬新貽因救援臨淮未回蒙邑英翰以數千人扼紮小澗集所恃以守城殺賊者僅練總李南華一軍耳其奮發有爲之概求之將弁中不可多得見被苗練圍攻日蹙若不設法援救恐壯士聞而灰心苗逆亦因之得志著僧格林沁督同富明阿等迅飭諸軍一面截賊糧運一面

挑選勁旅分攻賊營務期糧道可通城中得有接濟方爲妥善若徒以外圍賊營爲事遷延日月坐令蒙邑被陷縱能攻破賊營恐所得不償所失也將此由六百里各諭令知之○諭張集馨奏彙報各路剿匪獲勝情形並周有全李雲麟各軍擊賊獲勝等摺片曹克忠一軍由三水直抵白吉原誘賊出戰斃賊甚多賊向固原而遁雷正綰自攻克拜家河後肅清永壽立解邠州城圍將亭口賊巢攻克見與曹克忠約會夾擊陶茂林自克麻子崖後復攻克桃園堡火燒村等賊壘○處惟鳳翔府北尙有大股賊巢直達汧隴著多隆阿卽飭陶茂林將郡北大股逆匪埽除直達平涼力圖收復雷正綰當乘此聲威卽行入甘節節埽蕩如沿途尙有阻隔著熙麟派兵迎探會合進剿並激勵兵團俾益加鼓舞以收廓清之效陝西餘匪未靖更當飭令曹克忠一軍實力進除餘孽再行

節節前進盤厓一城前據多隆阿奏業經合圍近日當已攻拔著  
卽督同穆圖善等認真剿辦山陽逆匪圖竄商州雖李雲麟等小  
有擒獲尙未據報克復張集馨摺內有李雲麟連日未曾出隊及  
藍斯明人馬俱受槍傷等語著劉蓉飛催李雲麟迅將山陽攻復  
盡殲醜類如任令竄擾商州定惟李雲麟是問多隆阿卽飭藍斯  
明會同李雲麟相機兜剿藍斯明受傷情形並著查明具奏李雲  
麟前派之守備龍常等赴石泉同守城垣見據漢陰紳士稟稱龍  
常胡文勝駐紮城內與民團雜處恐誤事機張集馨已令其會同  
守隘並令周有全就近調撥擇要嚴防著劉蓉卽行知照李雲麟  
飭令龍常等扼要駐紮勿令賊氛擾近城垣是爲至要漢中賊勢  
極爲猖獗劉蓉當剋日進剿並知照多隆阿撥兵合擊以期早日  
殄除不得再有遲誤程景鵬殺斃馮元佐句引土匪謀逆張集馨

已令同官縣知縣周文會等拏辦程景鵬不服拘拏業被眾勇砍斃眾勇悉遵約束見復出示曉諭願歸農者聽其歸農願赴甘者卽由雷致遠帶赴慶陽所辦尙屬妥協此起團丁如由雷致遠帶赴慶陽著熙麟加意約束無令滋事張集馨片內又稱寨內安靜可無他虞等語程景鵬既經誅鋤眾勇散遣自應將該寨平毀若仍畱空寨恐復有匪徒占踞爲患將來是否另派公正紳耆興辦並著查明具奏其未獲之韓可英等仍飭地方文武嚴緝不准一名漏網將此由六百里諭知多隆阿熙麟劉蓉雷正綰並傳諭張集馨知之○丁未僧格林沁國瑞富明阿奏臣僧格林沁自大名督軍南下十月初九日馳至許州偵探捻逆已由鎮平等處南通未便遠道馳追致誤援蒙遂督軍兼程東行並函致臣國瑞帶領馬步隊伍馳赴蒙城會剿十四日臣僧格林沁馳抵亳州查探毫

東四十里外各圩復叛從逆者不一而足卽派翼長舒通額等進紮廟集一帶各寨畏懼兵威均出圍謁見惟蔣集匪首陳葛幅意圖盤踞抗拒旋將該逆誘出正法仍出示曉諭解散苗黨以孤賊勢復探渦河南岸楊家寨係匪首楊心田盤踞東十五里之西洋集係匪首葛春元盤踞此二處均爲苗逆前敵並有礙我軍糧道臣僧格林沁於十八日進紮高鑪集攻楊家寨賊圩該逆負隅抗拒我軍以炸礮晝夜轟擊二十日將該寨房屋然燒賊匪乘夜突出我軍過河追剿殺賊多名因黑夜未便窮追當將該寨平毀二十一日臣國瑞帶隊馳至高鑪集次日卽進紮距蒙城十餘里之小湖集臣僧格林沁卽移紮西洋集之北岸葛家樓分軍進紮李家寨連日進攻西洋集賊寨該逆踞守甚密二十五日臣僧格林沁復商令臣國瑞帶兵赴蒙會合臣富明阿進攻南面賊營當卽

攻毀賊營一座是夜圍城賊匪復併力撲城並出犯長濠我軍守禦之際南路運糧賊營二十四座及蔡家圩逆眾悉行潛遁當經副都統恆齡等各率馬隊追擊殺賊極多恆齡卽在蔡家圩駐守二十六日臣等親督各軍分路進攻何建鼉先以炸礮猛攻西南要路傅振邦等帶隊齊進當將西南賊營攻破陳國瑞英翰詹啟綸分路進取連拔賊營斃賊無數敗匪向東奔突經陳國瑞等截殺過半餘皆撲河向北岸逃遁淹死甚多直至昏黑南岸僅賸東北三處賊壘復經陳國瑞親督勇隊攻破餘匪二千餘名向東南逃竄陳國瑞當卽派隊跟蹤追剿其北岸僅賸賊營五座是夜亦經姚廣武等攻破賊眾拌力向長濠猛撲均經我軍槍礮擊斃總兵王萬清正在巡察之時適有三四人暗越長濠該總兵親持短兵奮力砍倒一名忽聞有苗先生被殺之說當將賊屍搶入營中

呈請查驗臣等卽令蒙城縣知縣賀緒蕃紳士李南華等率眾前往辨認屬實當卽戮屍梟示是役共計殺斃賊眾數千蒙城之圍立解臣等一面卽行運送糧食入城軍民得慶再生歡聲動地其由沿河隄下潛行逃竄之賊不過數百人經托倫布等帶領馬隊截殺大半板橋集之匪亦卽返正陳國瑞派隊向東南追剿竄匪沿途擒殺殆盡逆黨苗憬開張建猷趙克元逃至雙湖集各寨隱匿經副將張從龍擒獲解營其雙湖等集均已誠心歸正至西洋集賊匪經官軍連日進攻轟斃無算該逆拌死拒守惟有趕緊調集步隊設法攻取復探擒首李大箇子魏羣率黨竄回岳家集等處擒首項盤等占踞石弓山等處臣僧格林沁已派翼長蘇克金等帶隊前往相機攻剿查逆賊苗沛霖已蒙 聖恩免治其罪竟不知悛改復行叛逆踞城戕官荼毒生靈實屬罪大惡極今幸仰



賴聖主威福將士用命一戰就戮並將悍黨苗憬開等一併生擒實足以伸天討而快人心至陳國瑞奮勇殺賊不避艱險詹啟綸率勇攻勦亦頗出力王萬清陣斬巨惡甚屬勇往合無仰懇聖恩將提奏總兵陳國瑞交部從優議敘總兵詹啟綸交部議敘補用總兵王萬清賞加勇號該員係由勇丁出身見在候補例無廉俸並擬賞銀一千兩以示鼓勵其餘出力官弁可否查明保奏之處出自天恩又奏臣等以蒙圖既解亟須分撥官兵進取懷遠等處以殄賊氛見在公同商酌臣富明阿卽帶領所部馬步官兵馳赴懷遠並令總兵陳國瑞帶領所部馳赴下蔡規取苗逆老巢復派臬司英翰帶領所部繼進作爲陳國瑞後路辦理安撫事宜隨時策應至豫省尙有張總愚率黨在西路滋擾該省前次截畱之黑龍江餘丁五百名見由臣僧格林沁派色爾固善前赴

張之萬軍營妥爲教練以資防剿捻逆程二老砍見已率眾竄回亳州以南老巢聞又有出巢之信近日從逆之眾有來營投誠者亦有各處避匿者臣等見因兵力不敷分撥暫時羈縻分別酌量准予來歸一俟兵力可分卽當相機剿辦 上諭內閣僧格林沁等奏督軍進援蒙城斬馘首逆苗沛霖生擒悍黨踏平賊壘立解城圍一摺苗沛霖以諸生充當練總擢至道員不思圖報高厚竟敢怙惡不悛屢降屢叛戕官踞城荼毒生靈罪大惡極見經僧格林沁督兵砍殺戮屍梟示洵足以申國憲而快人心僧格林沁甫抵蒙城元兇授首具見調度有方深堪嘉尚著交部從優議敘富明阿國瑞著一併交部從優議敘記名總兵陳國瑞著俟補總兵後以提督記名簡放總兵詹啟綸著遇有提督缺出儘先提奏總兵王萬清著賞給勁勇巴圖魯名號蒙城官紳李南華等固守待

援時逾數月卒能保全要地實屬異常奮勉李南華前經唐訓方保奏降旨以副將補用著再加恩交軍機處記名遇有總兵缺出請旨簡放署蒙城縣知縣賀緒蕃著免補知縣以同知直隸州知州補用並賞加四品銜以示優獎其餘解圍出力及嬰城固守之員弁官紳著僧格林沁等查明擇尤保奏候旨施恩○李鴻章奏查逆匪僞忠王部下僞王郅雲官伍貴汶汪汝均周汝佳等因回援蘇錫屢戰屢挫蘇省四路圍困金陵官軍攻奪孝陵衛糧路斷絕該逆大勢已去轉求管帶魁字營副將鄭國魁遞稟乞降臣以蘇州城大且堅猝難攻破暫行給諭招撫令程學啟鄭國魁反復開導曉以利害多設方略脅以兵威該僞王汪汝均郅雲官先後密約程學啟單騎相見於城北洋澄湖情詞懇順求勿開礮轟打臣與程學啟籌商蘇城本係忠逆巢穴該逆往來援救行蹤無定

其城守事宜專交粵西老賊僞暮王譚紹洸主持譚逆堅忍兇狡從前杭州湖州各城均係該逆攻陷必須除此三患勒令該降眾等或生擒忠逆或斬暮逆首級來獻始准收撫程學啟戈登自十月二十日起逐日偪抵城根挖壘濬濠修築礮臺安設大礮布置攻具爲卽日轟打之勢城內賊眾惟暮逆一股守志甚堅餘皆解體忠逆見人心散亂卽於二十夜帶所部萬餘由胥門出走光福靈巖一帶小路搭橋而去二十三等日程學啟督隊攻婁齊二門李朝斌督水陸各軍攻封盤二門黃翼升督水師牽制閘門竄路晝夜不撤愈攻愈緊二十四日暮逆傳令各僞王上城堵禦正在對眾指揮邵雲官商令僞天將汪有爲出其不意立拔腰刀刺殺之大眾呼噪齊入將暮逆死黨殺斃千餘邵雲官稟求調兵入城協剿是夜開齊門迎降程學啟卽飭鄭國魁鄭國榜帶兩營隊

伍入城彈壓二十五日邵雲官等齎暮逆譚紹洸首級來獻臣令營中降卒驗視無訛城內脅從概行薙髮程學啟親督各隊入東門安撫降眾並督軍搜剿暮逆餘黨數百名李朝斌張遇春何安泰等帶隊由盤門截殺黃翼升等由閶門截殺又斃五六百名解散數千人惟投誠賊黨有四僞王四天將之眾欲求添立二十營隨同剿賊該酋等又在賊中爲大頭目狼子野心恐其難制臣與程學啟暨諸將密商宜乘其窮蹙設法驅除免致尾大不掉另生枝節因令程學啟遣親信隊伍駐守婁齊葑盤各門二十六日程學啟督同劉士奇等帶隊分門並進擊斃悍賊二千餘名餘眾肉袒稽首乞就遣散亦有捆載輜重財物驚遁出城者於是城內稍就清理立將省城克復臣卽日入城巡視並令程學啟督帶八營駐守一面會督地方官紳將存城降眾難民妥籌遣散安置之方

以善其後臣查蘇省被踞四載與金陵杭州爲逆匪三大巢窟互相犄角根柢極爲深固臣由上海偏隅節節進攻本不得勢賊眾兵單時深惴懼仰蒙皇上指授機宜多方激勵而督臣曾國藩遣將助兵隨事商榷將士和協一心遂得屢挫兇鋒圍逼城根黨眾乞降渠魁授首先下名城實非臣之愚慮所及皆緣聖主威德遠被氣機大轉賊勢日衰金陵杭州當可以次得手遇缺提奏提督南頓鎮總兵程學啟忠勇謀略戰功最多經營蘇城甫及半年兵不滿萬所向無敵用兵如神應如何優加獎勵之處出自聖裁英國兵官會帶常勝軍權授江蘇總兵戈登奮勇勤苦洞悉機謀火攻利器尤多贊助擬請旨酌加賞賚俾事竣回國藉示榮寵統領太湖水師候補提督處州鎮總兵李朝斌統領淮揚水師遇缺提奏提督淮揚鎮總兵黃翼升勞苦戰爭謀勇兼裕蘇州面

面皆水惟水師之功居多該二員均應請旨酌予優獎至尤爲出力將領另繕清單額懇恩施陣亡將弁並繕清單懇恩飭部從優議卹 上諭李鴻章奏督軍攻剿蘇州城垣賊勢窮蹙內應官軍入城截殺克復省城一摺覽奏實深欣慰仍著李鴻章督令將士乘勝進攻常州會師金陵埽穴擒渠廓清江境協辦大學士兩江總督曾國藩遣將助兵克復名城著交部從優議敘李鴻章自簡任江蘇巡撫以來悉心調度謀盡萬全疊下堅城戰功屢著此次督軍克復蘇州省城尤堪嘉尚著加恩賞加太子少保銜賞穿黃馬褂以示優獎黃翼升李朝斌均著賞給雲騎尉世職並交部從優議敘程學啟著賞給雲騎尉世職並賞穿黃馬褂權授江蘇省總兵戈登帶隊助剿洞悉機謀尤爲出力著賞給頭等功牌並賞銀一萬兩以示嘉獎○諭議政王軍機大臣等僧格林沁奏督軍

進援蒙城踏平賊壘殲斃首逆立解城圍一摺苗沛霖怙惡不悛  
屢降屢叛前乘官軍回救臨淮糾合醜類圍撲蒙城深濠固壘志  
在必得自僧格林沁督師抵蒙軍威大振南路運糧之賊營及蔡  
家圩逆眾聞風潛遁該親王復督將領分路進攻踏平賊壘多座  
苗沛霖暗越長濠希圖免脫經王萬清短兵砍斃立解城圍覽奏  
曷勝欣慰見在元兇就戮壽州下蔡等處賊膽已寒亟宜乘勝進  
兵埽除巢穴且懷遠縣城昨據唐訓方奏業經收復著僧格林沁  
飭令富明阿督同陳國瑞等迅速進取下蔡苗逆老巢唐訓方恪  
遵昨日諭旨商同李世忠率水陸各軍分勦壽州踞匪並著曾國  
藩嚴飭駐守潁六之文武員弁會師夾擊務將苗逆餘黨悉數殲  
除毋令一名漏網至捻首李大箇子竄回岳家集項盤等占踞石  
弓山等處程二老砍復回亳州有出巢肆擾之信加以苗逆餘黨



隨在可以併入見在僧格林沁在皖恐匪眾不敢回巢四出紛擾該大臣已派蘇克金等分路攻剿一經得手更恐伺隙旁竄楚豫山左各邊境不可不加意防範力遏賊氛著官文吳棠嚴樹森張之萬閻敬銘分飭所屬豫爲戒備實力截剿儻匪蹤竄擾何省地方卽惟何省督撫是問不能寬貸也張之萬奏畱之黑龍江餘丁及察哈爾馬匹已據僧格林沁派令色爾固善赴豫教練著張之萬隨時整飭俾成勁旅其張總愚一股見竄何處並著張之萬督飭張曜等趕緊殲除毋貽鄰患本日據李鴻章馳奏蘇州省城業經官軍克復計可乘勝進取無錫常州近來各路軍營更番奏捷天時人事大有轉機各路統兵大臣及各該督撫等受朝廷委任深恩其各振刷精神力圖掃蕩廓清函夏有厚望焉將此由六百里各諭令知之○諭李鴻章奏督軍攻剿蘇州克復省垣一摺逆

匪盤踞蘇城與金陵杭城互爲犄角蘇城得手他處自不難迎刃而解惟忠逆帶所部萬餘由光福靈巖一帶小路搭橋而去此路係前次該逆首由滸關潛入蘇城之路恐復自立一幟擁眾踞我要隘或竄出重圍紛擾他處希冀分我兵力著李鴻章迅卽查明忠逆實在下落具奏譚逆授首其手下之僞王天將等如何安置降眾除解散外分隸各營共有若干俟部勒稍定可以進攻常州該撫能否在蘇城駐守居中調度抑或親赴無錫常州督勦之處均著酌度妥辦上海一隅爲華洋交涉要地餉源所繫劉卹膏等日後能否辦理裕如並應否酌畱武職大員在彼駐紮彈壓李鴻章仍當隨時兼顧以期周密忠逆兇狡異常人數尙眾此次見蘇城人心散亂卽率眾潛逃失勢之賊其部下亦必各懷離異著李鴻章一面設法用計誘擒一面檄令無錫等處官軍慎重防範來

則痛加剿截該逆不得志於蘇必將肆毒於浙左宗棠務飭蔣益  
澧等嚴行防剿蘇垣既克杭省賊勢漸孤並著飭令各軍奮力攻  
克以成破竹之勢金陵至蘇之路已斷惟恐該逆仍思鋌走曾國  
藩飭令曾國荃加意慎防並乘隙圖取石城如能句合內應較有  
把握此外皖南江西鎮江江北等處頭頭是道曾國藩都興阿沈  
葆楨馮子材魁玉等當各飭將弁慎固地方勿令敗匪肆意闖入  
此次攻克蘇城戈登甚爲奮勇出力著李鴻章傳旨嘉獎本日已  
明降諭旨賞給戈登頭等功牌並賞銀一萬兩以示嘉獎所有銀  
兩著李鴻章籌款賞給外國本有寶星名目崇厚等曾經製造有  
式諒李鴻章亦必知之所有賞給頭等功牌即可倣照變通辦理  
本日據僧格林沁奏蒙城解圍苗逆授首北路亦漸可廓清揚州  
及裏下河一帶防務已鬆都興阿駐紮揚州保衛裏下河等處完

善之區見在江南賊勢日蹙亟須飭令水陸各營嚴密整備不可稍有罅漏爲賊所乘曾國藩總統諸軍尤當督飭各處帶兵大員愼益加愼以成全功同膺懋賞有厚望焉將此由六百里各諭令知之○予江蘇陣亡遊擊張福等祭葬世職○戊申論議政王軍機大臣等劉長佑奏畿輔軍務已竣遵旨回省酌畱兵勇妥籌分布一摺劉長佑以直境漸就肅清各營標兵從征日久擬令暫爲休息概予撤回歸伍其各營勇丁除撤遣外見存余承恩練勇一千名崔福泰勇丁五百名李明惠陳飛熊等楚勇二千一百名並祝境舊募豫勇一千五百名共練勇五千餘名分布開東長及廣平威縣衡水河間等處以資捍衛所籌尙屬周妥見在直東交界伏莽尙多此項勇丁自不能不酌畱分布以備隨時搜捕防剿之用惟將來地方一律平靖增設營鎮議及久遠如該督前奏抽練

營兵酌募勇丁各事宜仍須懷遵前諭一切俱從標兵體制募勇一節仍當於本省地方招募教練較爲得宜其見在撤存楚勇一俟全境清謐仍可隨時妥爲撤遣或調赴他省有賊處所剿賊較爲妥善至畿輔東西大道騎馬賊匪出沒剽掠該督見將各營選畱膘壯馬勇二百名分赴大道各州縣搜緝此係何項馬勇統帶之員究係何人儻或以軍營遣撤毫無紀律之眾任其散布各州縣地方不但不能得力且恐借搜緝爲名到處騷擾或竟暗與馬賊通氣劫掠分肥均不可不嚴爲之備著劉長佑認真察看如不可畱卽當一律裁遣毋滋後患該督見已定期回省卽著將吏治營伍一切應辦各事宜實力整頓以副朝廷簡任畿疆至意提督鄭魁士自到營以來追剿賊匪頗著勞績見以舊傷觸寒舉發著准其回籍調養以示體恤其已革總兵伊綿阿並准其畱於大名

防所以資得力將此諭令知之○曾國藩彭玉麟楊岳斌奏臣玉麟率喻俊明等水師兩營並約吳坤修等陸師六營出金寶圩之北進攻水陽臣岳斌亦率李濟清等戰船來會師次窯灣九月二十六日喻俊明等乘夜運礮過河密排洲次撤夜環轟比曉將石壘攻毀遂合吳坤修李濟清等併攻水陽破之其南路則有成發翔等帶三板進南湖毀夾岸兩卡卽於次日衝過新河莊從油榨溝倒擊而下時王可陞由金寶圩之南進攻新河莊正與賊眾相持各水勇登岸大呼踰濠競入力攻新河莊又破之水陽迤北曰滄溪距滄溪十餘里曰塘溝爲直達高淳之要路臣玉麟於二十九日令吳坤修等往取滄溪親督水陸各軍襲陷塘溝十月初一日進拔高淳湖口賊壘並將長樂鎮攻克吳坤修亦自滄溪戰勝而還乃合軍謀進高淳賊目楊友青遣人通款臣玉麟察其情詞

可信責令將僞輔王餘黨翦除始許其降初二日率師入城安撫  
悉遣降眾是夜略地而東並取固城一鎮此水陸連破要隘收復  
高淳縣城之情形也至江會義申法喜二酋自太平旌德叛去下  
竄東安鎮圖與僞匡王賴汶鴻合股易開俊以旌城初復賊未遠  
颺利在速戰而又慮廣德撫議未成仍爲該二酋挾之以叛也乃  
遣降人彭國鈞間道入廣德馳諭招之一面部勒營伍於初三日  
度環雲嶺將抵東安鎮市口賊館如雲散布村落聞我軍騰蹕而  
入所遇輒殲賊受大創闕然而潰維時甯郡守將劉松山方揚隊  
於場村何村一帶訶知株木店增賊四千人悉自東安鎮戰敗  
而來乃引軍突出截之賊眾駭奔劉松山親督各勇驅出廣德大  
路旋即移軍東嚮將攻甯國縣城詎城賊賴汶鴻先經聞風宵遁  
而易開俊所派之軍適至遂與劉松山會復城池初四日彭國鈞

返自廣德引降將鄭魁武部眾萬餘人詣東安鎮軍前乞降易開  
俊曉以大義簡畱一營餘則概予貲遣惟鄭魁武舉眾來歸廣德  
一城又爲江申二酋叛黨乘虛竊踞矣初新河莊旣克尙有東夏  
四壘爲建平東壩之樞紐初六日鮑超令馮標等屯軍曹塘進攻  
東夏賊恃牆闊濠深堅伏不出馮標等奮力齊進立將四壘攻破  
自是東壩守賊黎立新等密約內應建平守賊張勝祿等請獻城  
池定議建平撫事使馮標任之東壩戰事則鮑超與臣玉麟任之  
初七日臣玉麟率水師八營及吳坤修陸勇六營鮑超亦率馬步  
十三營合趨東壩見上壩高峙三大壘壩後築有僞城橫互數里  
正議分軍立寨僞隨王楊柳谷馳告壘賊梗命楊輔青實爲謀主  
乞速進兵以踐黎立新之約鮑超卽令譚勝達等繞壘圍攻臣玉  
麟亦令喻俊明等五營依護吳坤修等各隊直出壘下適臣岳斌



飛檄而來督令李濟清等專向水路助陣戰不逾時殲賊盈千賊多踰壘而逸楊輔青從亂軍中敗往溧陽而楊柳谷立獻僞城乃克東壩要隘東壩復而建平之捷書亦至自馮標入境宣諭張勝祿等十二人感激涕零矢志不貳卽於是日斬僞跟王藍仁得舉城以降建平復而溧水之降書又至踞溧水者爲楊英青黨眾萬餘願繳軍械各散回籍十二日臣玉麟會同臣岳斌帶隊進城撫慰盡將降眾遣散伏查江皖接壤之區以東壩爲最要關鍵仰賴天威震疊警服羣酋旬日之間收復四城攻克東壩臣國藩見檄鮑超全軍駐守東壩保此三省扼要之地卽爲附近遊擊之師檄派王可陞守溧水李榕守建平洪容海守高淳朱品隆喻吉三兩軍分守青陽石埭太平三城易開俊劉松山兩軍分守甯郡旌德涇縣三城此外無兵可撥以故廣德一州未能進剿甯國一縣

未能置守諸賊目革面自新有裨全局似宜宥其罪而並錄其功相應開列籲懇 聖恩分別給予虛銜頂戴以昭激勸其餘大小頭目可否酌給虛銜此次在事出力人員可否容 臣等查明併案保獎之處出自逾格 鴻施陣亡各員弁均俟一併確查彙案請

卹 上諭皖南水陸官軍陸續攻克水陽新河莊東壩各隘高淳甯國建平溧水四城賊目楊友青楊柳谷鄭魁武張勝祿等或率眾投誠或獻城內應辦理甚爲得手惟投誠畱營之眾須隨時畱意妥爲駕馭勿令再有反覆其遣散之眾亦須令其呈繳軍械分散行走毋聽其隨地屯集復成巨股江申二逆乘虛竊踞廣德州城該處爲江皖門戶最係扼要之區曾國藩務當乘此聲威派撥勁旅迅速馳往將該城攻拔以期與浙師聯絡皖南境內已無大股賊匪曾國藩派撥諸軍分駐青陽等各城著卽飭令駐守各軍

將附近餘匪分路剿除並飭前敵水陸各營乘勝由東壩高溧一帶分途進取自當勢如破竹李鴻章一軍旣克蘇城無錫常郡自可迎刃而解該大臣當檄飭各營將士與李鴻章聯絡聲勢節節進取爲合圍金陵之計仍須愼益加愼勿稍大意將此由六百里諭令知之○諭張集馨奏收復山陽縣城石泉擊賊獲勝雷正綰等軍剿辦情形請保出力紳團並定遠廳團勇防剿得力各摺片山陽縣城踞匪經李雲麟藍斯明兩路進攻該逆乘夜東竄至中村銀花一帶當將縣城退出此股逆匪已距商州不遠該處界連秦豫楚三省山徑紛歧設爲該匪盤踞勢將滋蔓難圖且與豫省之浙川鎮平內鄉等處甚近尤慮其勾結張總愚股匪蔓延秦豫見在山陽縣賊匪雖經棄城東遁並未大受懲創著李雲麟懷遵前旨迅將此股殄滅淨盡儻任其盤踞商城致與豫捻勾合惟李

雲麟是問龍常一軍遷延數日始由興安進至石泉復節次退至池河漢陰沿途滋擾以致民心疑懼幾誤大局總由李雲麟紀律不嚴所致守備龍常著卽先行革職仍著李雲麟查明該革員如有縱勇滋擾情節卽著嚴參重懲毋稍姑息其所部隴軍多有城固潰勇極不安分恐蹈漢南城固覆轍句結外匪著卽責成李雲麟查察如不可用卽行遣撤興安一帶防堵緊要兵力甚單李雲麟務將中村銀花一帶股匪速行剿盡卽由商州移師興安聯絡鄉團認真防守周有全所統礮船見經鄂省檄調東回鄖陽惟茶鎮地方最當衝要非得此軍扼守不能杜賊紛竄周有全前已有旨令其暫署陝安道篆務著官文嚴樹森飭令該員速赴新任並將所部礮船仍歸該員統帶前進扼要防守不得藉詞奏畱武關一帶地近商州著多隆阿撥兵嚴密扼守雷正綰曹克忠陶茂林

各軍分路剿辦白吉原等處之賊該匪見聚麟遊一隅著多隆阿  
卽飭令該將士等繞出賊前杜其竄往平涼之路所有陝省西南  
兩路各州縣出力團練卽著張集馨加以激勸其實在出力者查  
明保奏以資鼓勵毋許冒濫定遠廳三面皆賊並無官兵助剿該  
處民團同心禦侮屢卻兇鋒殊堪嘉尙如再能始終奮勉卽著查  
明奏獎並著劉蓉進圖漢南速行攻克毋令該匪四出紛擾日滋  
蔓延將此由六百里諭知官文多隆阿劉蓉嚴樹森李雲麟並傳  
諭張集馨知之○諭毛鴻賓等奏收復信宜縣城陳逆餘黨全行  
解散並容縣岑溪次第克復石逆餘黨見竄懷集縣境檄調楚軍  
進剿各摺片此次高州軍務雖經崑壽督軍前往疊破賊之堅巢  
軍威丕振該督督辦全省軍務尤須愼益加愼不可稍自矜飾降  
眾人數太多又有同時投誠之化州石水堡西甯排阜加益陽春

八甲雙溝等處餘匪一時解散均未大經懲創務須妥籌辦理不可稍涉苟且致令反側滋生事端信宜等處善後事宜尤須切實講求辦理容縣岑溪相繼收復兩廣軍情同時得手其由容岑逃往藤縣之羅洞等處餘匪卽著毛鴻賓等嚴飭方耀等軍會合西師乘勢埽除務期淨盡毋畱餘孽並著與張凱嵩飭令唐啟蔭蔣澤春會同督率文武紳團合力防剿及將一切撫綏善後各事宜妥爲辦理廣海客匪遁歸老巢著該督撫速飭卓興得勝之師移勦陽春一路痛彰撻伐務令刁頑咸知悔懼仍督令地方官吏勦撫兼施設法妥爲解散安插俾客土釁端永絕方爲妥善石逆餘黨李幅猷由蜀繞黔闖入楚境復擁眾竄擾粵邊節經諭令楚黔兩粵各督撫合兵勦辦茲據毛鴻賓所奏李幅猷自率大股竄往廣西其黨李幅曾貴在廣西懷集縣之石埜坑尾樹柵屯糧將圖

久踞該處逼近廣東陽山縣境逆黨之計圖負阻垂涎粵東膏腴  
可想而知毛鴻賓見已檄調張運蘭一軍由郴州度騎田嶺直抵  
連州順流進剿卽著該督與惲世臨嚴飭此軍星速進兵務乘石  
瑩等賊壘未堅迅速掩捕並令見駐宜章之楊虎臣所部嚴堵該  
逆竄越江楚之路此股餘匪游弋楚粵邊界已久人數尙眾若使  
負隅久踞及遣黨四出乘隙鳴張剿辦又將費手毛鴻賓惲世臨  
張凱嵩等卽當各督楚粵諸軍會合兜剿乘賊游魂殘喘之際一  
鼓殲除儻或進剿不能實力各懷觀望令餘匪仍復蔓延必惟該  
督撫是問另片奏請將劫盜重案酌擬章程變通辦理等語業照  
所請明發諭旨准行粵東民俗頑悍者多當此地方積亂之後自  
應設法變通辦理以資整頓但人命至重亦須嚴飭地方官吏不  
得藉此擅作威福任意草菅致滋流弊將此由六百里各諭令知

之○已酉左宗棠奏劉典一軍移紮績溪後僞金王僞東平王僞根王等數大股不能上犯徽歙遂由甯國縣千秋關竄入浙境蔓延昌化於潛一帶直至淳安分水邊界希圖擾我腹地以牽動杭州餘杭官軍之勢劉典聞賊竄昌化之信卽飭總兵黃少春補用知府李耀南等各率所部於九月十八日自績溪啟行由昱嶺關赴昌化進剿並派張聲恆所部千人回扼淳安而自駐績溪縣臨溪地方以防旌德之賊上犯二十一日黃少春等行至株柳地方遇先鋒悍賊百餘人盡殲之乘勝進攻水穿司賊巢該逆猝不及防殺賊數百名正俘斬閒後面賊隊突至憑河抗拒李耀南揮兵齊進賊勢不支紛紛敗竄我軍追至白牛橋忽僞金王根王等大隊蠡擁來援我軍扼橋力堵鏖戰良久賊復從右路山谷竄出幸黃少春等先已派隊伏叢莽中賊至伏發復斃賊百餘名李耀南



等俟黃少春等鈔出賊後亦奪橋而進賊大驚潰我軍三面合追該逆奪路狂奔沿途斃賊數百名生擒二百餘名立將昌化縣城收復餘黨向甯國縣界竄去是夜於潛太陽埠錫口等處之賊亦聞風潛遁二十二日黃少春等督隊冒雨追之不及遂收隊還二十八日仍折回安徽績溪老營該隊後起復由甯國竄至孝豐與前由廣德竄來各股合隊眾尙數萬十月初三四等日分爲兩股一竄臨安西鄉一竄臨安北鄉去餘杭青山官軍營盤均不甚遠臣飛飭駐紮新城副將劉明燈等派隊進剿蔣益澧亦飭遊擊徐文秀率所部五營赴亭子頭會剿初八日各營馳抵臨安北路賊見官軍至卽倉皇奔逃僅追殺數十名初九日劉明燈等進攻西路賊巢一鼓齊進該逆紛紛驚竄各勇圍殺斃賊七八百名生擒三百餘名餘賊翻山北竄見在杭州餘杭兩城該逆堅守如故各

軍防勦援賊勢難合圍應俟援皖各軍回浙乃敷分布臣前以皖賊紛紛竄浙上游喫緊石太旌德未復徽防不可稍鬆王開琳畱防黟縣劉典移軍績溪均難遽撤不得不暫屯嚴州以期上下兼顧頃據報皖南軍情石埭古逆獻城投降太平旌德逆匪或降或走均已收復徽池一律肅清餘眾竄踞甯國廣德孝豐之間勢甚渙散臣擬令劉典所部各營由昌化於潛趨臨安進勦孝豐爲規取湖州之計王開琳一軍見當徽防無事亦可調歸以備策應臣軍後路穩固亦卽日移紮富陽督飭各軍先將餘杭攻克然後悉力杭州分規湖郡仍與皖南各軍聯絡一氣互相應援斷不稍分畛域致誤大局又奏臣在嚴州軍營接奉諭旨青陽雖已解圍而太平石埭旌德甯國四縣尙爲賊踞徽郡防務未可稍鬆左宗棠駐軍富陽距徽防稍遠但係浙師後路亟須妥籌兼顧仍著隨時

策應與皖南諸軍聯絡聲勢臣惟制賊之要在避長圍防後路上  
年十一月調道員王文瑞等入皖共一萬餘人均於無可抽調中  
勉爲抽調亦嚴防後路之意也昨因青陽圍解逆首僞金王鍾逆  
僞東平王何逆等各率黨夥東竄臣卽飛飭劉典王開琳漸次移  
軍東向扼其由皖竄浙之路於時曾國藩有調浙軍過嶺會剿之  
咨臣未敢應蓋青陽之圍旣解石太賊勢已孤野無可掠自無久  
踞之理又江忠義等旣軍其西鮑超一軍復偏其東勢必偏賊南  
趨恐將闌入浙境若由歙境竄淳安遂安則出臣軍之後若由績  
溪甯國竄昌化於潛則出杭州餘杭各軍之後殘黎何堪再擾而  
浙江大局亦將被其牽綴臣所以剋期進紮富陽旋復中止者此  
也浙軍援皖自應兼顧浙境斷無坐視皖賊入浙之理浙軍嚴防  
後路自應先其近者斷無舍近圖遠之理臣所以檄劉典等軍漸

次東向過賊竄浙之路劉典所以駐軍臨溪一聞賊由甯國縣境北竄昌化卽派隊馳援者此也幸而竄入昌化之賊經總兵黃少春等由績溪入昱嶺關回援一戰破之若已出嶺會剿則前拒虎而後進狼誠恐於皖未必有功於浙則必有害耳昌化肅清後劉典所派之黃少春等收隊回皖仍駐臨溪老營見在石埭太平旌德之賊業已肅清甯國縣亦已無賊而湖州孝豐一帶竄來之賊甚多天目山麓時有大股賊蹤出沒以局勢論之則皖緩而浙急也明矣臣軍之入皖者卽應調回浙省以備進剿臣仍當妥籌兼顧不敢稍涉疏虞上諭議政王軍機大臣等湖州孝豐一帶竄賊甚多天目山麓時有大股賊蹤出沒浙省援皖之軍自應調回迅籌進剿見在皖南軍事大定昨據曾國藩等奏到東壩甯國高淳溧水各城次第俱下惟廣德尙爲賊踞皖軍得手逆賊南趨浙

境必然之勢昨已諭令留國藩速調勁旅進克廣德堅城與浙軍互相聯絡左宗棠見檄劉典所部由昌化於潛趨臨安進剿孝豐並將王開琳一軍調回策應卽著飭令劉典等迅速進兵收復孝豐爲規取湖州之計並與皖南進攻廣德之師互爲聲援杭州餘杭賊勢如故該督見擬卽日移軍富陽督軍先克餘杭然後悉力杭州諒不難次第埽蕩見在蘇州省垣業已克復皖南亦漸就廓清各路軍情同時得手金陵杭州兩城各軍已薄城下立盼捷音該督其迅奏膚功同膺懋賞有厚望焉將此由六百里諭令知之

○諭多隆阿奏邠乾肅清援軍入甘並圍攻盤屋剿辦各路情形請飭甘省設立轉運糧臺等摺片李雲麟奏追剿鎮安竄匪山陽失守旋克各情一摺曹克忠與雷正綰之軍於邠州長武一帶將白吉原等處老巢回匪痛加殲戮賊見尙聚麟遊一隅陶茂林將

鳳翔東北賊壘先後掃除復掃盡附郡村落各賊巢軍聲殊振多隆阿見以麟遊之賊飭曹克忠統率所部相機進擣與雷正綰之軍遙爲聲援可收前後夾擊之效並飭陶茂林乘勝進攻汧隴以期迅速赴甘會合雷正綰之軍節節掃蕩所籌均合機宜著卽懷遵昨寄諭旨飭令各將士務將麟遊等處之賊趕緊殲除並須繞出賊前杜賊再行西竄之路此時陝省回氛漸戢而餘燄尙多甘省則惡氛一片恐鳳隴邠乾等處被擊之賊紛紛西遁必致聚集愈多剿辦愈益費手雷正綰見抵靈臺已入甘境陶茂林所部由汧隴而前卽當聯合一氣前截後追毋令逆氛得以竄入平涼等處多隆阿馳抵盤匡城下著卽迅速籌攻毋爲此一隅所牽致稽全局該將軍擬令曹克忠七營之兵廓清麟遊一帶敗匪卽移紮岐山鎮遏畱壩等處上犯之賊及爲陶茂林後路聲勢布置洵不

可少見據李雲麟所奏藍二順股匪由山陽竄走中村銀花其前隊復東竄大吉河瓦房灘一帶離豫僅百餘里而商雒適當其衝總兵藍斯明之軍由多隆阿派令由商境進剿著卽嚴飭扼剿賊之東竄商州北犯雒南各路如其兵力不敷卽由多隆阿酌量撥兵援濟豫境浙川楚境鄖陽均屬毗連並著官文嚴樹森飭令駐鄖官軍隨時偵緝與秦豫兩省之軍相爲援應張總愚一股刻下竄至何處尤應豫防其與藍逆竄合張之萬嚴督豫軍實力截剿此時三省之軍果能乘賊奔竄併力以圖諒亦不難盡殲醜類萬不可稍存畛域之見陝南軍務正當喫緊劉蓉何以尙未入境著卽懷遵前旨星馳前進力圖恢復漢中等城藍逆一股出竄漢洋賊勢稍分尤應乘勢進攻李雲麟回紮九里坪擬取道米糧川以渡蜀河返顧興安據稱藍逆身帶重傷此股賊目損傷過半但有

勁旅窮追不難殄滅若徒係紙上空談不以追賊自任力籌堵剿將來藍逆之勢復張及興漢之賊再有分股北竄商潼定惟該京堂是問雷正綰等各軍入甘本日業經寄諭熙麟等卽於甘省設立轉運糧臺以爲支應並嚴催英桂等將晉省應撥協餉星速撥解惟甘省旣餉源匱絀萬難足恃而晉餉亦解到需時雷正綰等之軍由陝入甘仍著張集馨由陝省源源籌濟毋令缺乏致誤軍行前交多隆阿會查恩麟各件嗣復有明降諭旨撤去慶昫專交多隆阿查辦卽著該將軍於將來到甘後再行秉公確切查明辦理李雲麟所請將援陝楚軍保獎之處著准其咨行官文等查保毋許冒濫將此由六百里諭知官文嚴樹森張之萬多隆阿雷正綰劉蓉李雲麟並傳諭張集馨知之○諭多隆阿奏雷正綰一軍見已馳抵甘境陶茂林一軍俟汧隴廓清後亦可迅速赴甘請飭



熙麟就近設立糧臺源源轉運等語該二營軍火餉需亟宜寬爲籌備以利攻剿熙麟恩麟身任甘省大員籌餉濟軍責無旁貸卽著熙麟等細心規畫設立轉運糧臺將雷正綰等軍所需糧餉等項迅籌撥解以資軍食該督等務當於萬難籌措之中設法接濟恩麟前次奏撥山西協餉係指撥雷正綰軍營之用並著英桂鄭敦謹懷遵前諭督同河東道於省庫運庫無論何款先行籌撥銀數萬兩剋期解甘以濟要需甘省地方彫敝英桂鄭敦謹當不分畛域儘力籌措陸續解赴甘省毋稍延誤將此由六百里諭知熙麟英桂並傳諭恩麟鄭敦謹知之○辛亥諭議政王軍機大臣等富明阿奏苗黨剿洗殆盡皖北漸就肅清請撤回揚防官兵一摺苗逆就殲以後壽州下蔡等處自必望風瓦解李世忠等在穎壽如何得手陳國瑞等是否將下蔡老巢埽平近日軍務情形著僧

格林沁詳細馳奏江南蘇州府城克復後見在緊攻無錫常州金陵亦漸合圍若偪之愈緊恐逆眾窮極思竄江北實當衝要沿江綿長二百餘里港汊紛歧裏下河一帶完善之區髮逆久已注意揚防存兵無多不敷分布若有貽誤關係非輕援蒙各軍爲數不少況首逆已誅皖事漸定江北援軍當可酌量調回著僧格林沁悉心籌畫如富明阿所帶各兵無須畱辦防務卽將揚防派來之兵全數撤回以資調遣李世忠蔣凝學進剿潁壽各軍著僧格林沁曾國藩飭令實力進攻不得因有大軍在皖稍存推諉觀望之心其蒙城附近各圩僧格林沁唐訓方派兵次第收復務期一律肅清苗逆黨與亦必須殲除淨盡無貽後患江北防務都興阿吳棠當就見有兵力悉力嚴防勿以目前無事稍涉大意江面水師都興阿尤宜悉心整頓以資得力富明阿另奏傷疾復發請回清

淮調理一片富明阿著賞假一箇月前赴清淮安心調理仍著隨時察探江北軍情與都興阿協力相機辦理將此由六百里各諭令知之○諭前據李雲麟奏藍二順股匪由山陽竄走中村銀花一帶當經諭令李雲麟以追賊自任力籌堵剿毋任分股北竄商撞等處茲據張集馨奏山陽竄出逆匪已由瓦房灘竄商南城下盤踞東岡勢甚危迫藍斯明進紮武岡所部僅二千人未免單弱多隆阿分兵四出勢難抽撥而李雲麟銳意西行不但商南城圍無兵可解設該匪竄入龍駒寨則糧道後路梗塞深爲可慮等語山陽失守以後李雲麟旣不能迅圖攻克已難辭咎見在該匪紛竄商南該京堂又全軍西行並不駐軍截剿前奏旣知藍斯明兵力單薄又不分兵協助設此股賊匪蔓延楚豫完善地方該京堂自問當得何罪著懷遵前旨督率兵勇迅解商南城圍殲除藍逆

稍贖前愆興安防守事宜李雲麟自應妥籌兼顧至規復漢中郡縣則須俟劉蓉督兵入陝會商夾擊方克有濟李雲麟於區區山陽一城尙不能剋期攻拔輒欲由興安進兵西上獨不思漢南羣盜如毛豈李雲麟一軍所能埽蕩者且舍目前之賊不剿而欲遠剿興安之賊揆之兵家緩急機宜豈有如此辦法著卽迅速回軍援剿毋令賊氛擾及商雒自滋罪戾多隆阿整厓之師計日卽可得手能否添撥數營助藍斯明攻剿之處或就曹克忠等援甘各軍內調回數營以資截剿均著該大臣迅速斟酌調派毋稍稽遲陝南賊勢如此狡猾劉蓉何以尙無入陝消息著卽恪遵疊次寄諭星速前進扼紫青石關一帶一面牽制賊勢一面知會李雲麟兩路進兵次第恢復漢南郡縣方爲不負委任至川北防務駱秉章業已豫爲布置諒可無虞劉蓉身爲陝撫責有攸歸豈能專顧

川邊置陝事緩急於不顧張集馨署理撫篆地方防剿事宜亦應  
認置整飭豈可因人成事莫展一籌該省回匪巢穴業經多隆阿  
掃除殆盡其商南竄匪張集馨責無旁貸著卽一面飛咨李雲麟  
回軍援剿一面檄飭地方文武揀發得力兵將嚴扼要隘會同李  
雲麟所部併力剿洗力解商南城圍以輔多隆阿兵力所不逮毋  
得徒事求援致負委任將此由六百里諭知多隆阿劉蓉李雲麟  
並傳諭張集馨知之○壬子唐訓方奏臣於懷遠收復後旋據陳  
國瑞英翰面稟苗逆伏誅蒙圍立解餘黨剿戮殆盡見復據宋慶  
等稟報陳國瑞於蒙城解圍後卽派宋慶督帶所部進克苗逆老  
寨經就近被脅各圩捆獻逆族數十人旋即攻克下蔡苗逆妻子  
均就誅戮逆黨苗添罄宋憬詩等餘眾不滿三千向西南竄去見  
已派兵追剿又據李世忠咨稱前派副將何璜集練助剿至十月

二十九日逆黨悉除生擒苗逆妻妾四人逆子一人遂將下蔡收復等情自此羣氛迅掃淮甸可期肅清除飭蔣凝學等進兵潁上正陽並由李世忠就近勦辦壽州正陽等處外臣尤當嚴飭所部搜捕餘黨安撫難民以期仰副我皇上除暴安良之至意上諭議政王軍機大臣等苗沛霖伏誅後陳國瑞卽派宋慶督領所部進克苗逆老巢李世忠派副將何璜帶練助勦旋將下蔡攻克苗逆妻子均就誅戮見在逆黨苗添磐宋憬詩等餘眾不滿三千向西南竄去著唐訓方會商陳國瑞飭令宋慶探明賊蹤實力追勦務將苗逆餘黨掃除淨盡如宋慶兵力不敷勦辦應如何添派勁旅會同掃蕩之處著僧格林沁富明阿陳國瑞唐訓方酌度情形相機布置務將竄出之苗添磐宋憬詩等逆黨悉數擒獲毋任漏網宋憬詩一犯自山東潛逃見復率眾由下蔡向西竄去恐其

遁歸商邱原籍及與竄豫之張總愚等捻股合夥著張之萬懷遵  
前旨遴派幹員於由皖入豫一帶及商邱地方認真剿截並設計  
誘擒毋任首惡逃逸正在寄諭閒吳棠奏捻首李大箇子等股匪  
由山東之單縣魚臺阻水折回豐碭經兵練截殺竄回永城之岳  
家集著張之萬督率兵勇乘其情歸迅速殄除清淮所派援蒙各  
軍應否抽撥北剿永宿捻匪之處著僧格林沁酌量調遣徐宿餉  
道最關緊要著吳棠卽飭派出之副將楊文全駐紮蕭碭嚴防該  
捻回竄以顧糧道將此由六百里各諭令知之○癸丑諭議政王  
軍機大臣等前因奉天府屬之昌圖廳所轄地方遼闊應否於理  
事通判外添設官職較大之員以資彈壓或於理事通判一缺酌  
量增改官階降旨令吏部議奏茲據奏請將該廳通判調缺改設  
理事同知題缺加四品銜由奉天府興京通判二缺內揀選題升

等語昌圖廳所轄地方幅員甚廣訟獄繁多每遇命盜械鬪各案相驗踏勘往返動經數日茲據吏部議將此缺改設同知加四品銜於該處地方情形能否相宜此外有無應行變通之處著玉明和潤德椿確切查明據實覆奏見任該廳通判色勒被控情節較重於此缺斷難勝任卽著玉明等於奉天興京兩通判內揀選精明幹練熟悉情形之員題升斯缺方爲妥協如不得其人再行奏請簡放至該處地方素多盜匪緝捕最關緊要應否添設武員兵丁之處著玉明等悉心妥議具奏昌圖廳所轄一帶地方詳細界址並著玉明等繪圖貼說具奏吏部原摺著鈔給閱看將此各諭令知之○諭張之萬奏毫捻鼠踞浙川窺伺陝疆並藍逆竄近西坪程逆回巢投誠續竄股匪屯聚沈邱等處正息一帶勦辦土匪情形各摺片張總愚股匪屯踞浙川廳境經總兵張曜分派各營



力據險要築壘扼守並將圍攻駐馬板山兩寨之賊擊退此股逆匪日夜窺伺秦境經張曜分軍扼紮嚴備西北賊計未逞惟豫省兵力本單藍逆一股又由山陽商州一帶竄近西坪雖經豫軍擊退而大股仍盤踞護水關界嶺等處設與張總愚合併則賊勢蔓延益難收拾張之萬見飭葛承霖統帶湘勇四營蔣希夷所部楚勇並駐守兩河口之張士元兩營前往浙川一帶防剿著卽嚴督諸軍星夜前進並飭令張曜分撥諸軍四面圍逼以期聚而殲旃李雲麟勦辦山陽股匪據報連獲勝仗何以該逆復有大股盤踞護水關等處竄近西坪該京卿勦辦此股不思乘勢東追輒行舍而西上實屬有意趨避著懷遵疊次寄諭速統所部折回東路繞向西坪扼紮迎頭截擊以斷藍張二逆合併之路儻任令該二逆勾合致成巨患李雲麟自問當得何罪荆子關西坪一帶爲秦豫

交界要區著多隆阿速

藍斯明帶兵前往與李雲麟分路扼紮

以固陝省藩籬並著添撥兵勇前往商雒一帶嚴密堵扼以爲李雲麟藍斯明二軍後路聲援一面將圍攻商州之賊迅速殲除其地方紳團卽由劉蓉張集馨檄令該處文武聯絡鼓舞以助兵力所不及仍著劉蓉迅速入陝不得逗遛川境致與該省聲息懸隔張總愚股匪如被豫軍剿急難保不北竄河陝南趨襄鄖並著多隆阿張集馨將潼商一路嚴行籌防英桂將蒲州一帶界連陝洛要隘豫籌防堵鄂省見已無賊張曜所部兵力甚單著官文嚴樹森速派得力兵勇越境馳赴浙川助剿殄豫境之寇氛卽以固楚省之藩籬毋許稍分畛域前此余際昌在方家寨剿賊陣亡卽由兵力太單所致官文嚴樹森當引爲前車之鑒趕緊派兵協助毋蹈從前覆轍程二老砍分股由楚續竄與前股回竄各匪屯聚沈

邱太和阜陽邊境經尹嘉賓等軍及各路民團由沙河南北兩岸沿途截擊殲斃甚多見經毛昶熙派兵屯紮周口著張之萬毛昶熙分飭尹嘉賓徐連陞並李大成蔣東才等軍會合鄉團分路堵截悉數殲除毋畱餘孽程逆一股前在豫省唐縣時不過數千自入鄂境後長驅而東蹂躪千里自光羅分股入豫人數業已逾萬且有所擄楚軍號衣多件著官文嚴樹森確切查明係屬何路兵勇敗挫毋得諱敗爲勝稍事粉飾程二砍之弟程大寬並程大砍之子程友正赴營納款經毛昶熙解赴僧格林沁軍營該逆竄擾數省焚掠千餘里罪不容誅自應卽行正法或須暫示羈縻爲誘擒首逆程二砍之處著僧格林沁斟酌辦理正息一帶伏莽尙多著張之萬飭令王文行李殿元王玉佩等軍將談家圍踞賊速行掃蕩並將曹魁一股殄除淨盡以靖南圉至毛昶熙駐軍歸德前

次皖捻出巢既未能力圖扼截又不能進擣老巢爲牽制該捻回顧之計此次程逆等股匪回巢又不能迎頭截剿該侍郎安居歸德城內莫展一籌卽如程大寬等投誠一事應准與否尙無決斷必須解赴僧格林沁軍營定奪如此懦怯巧猾誠不知其所司何事著卽迅督兵團進攻附近匪圩並將沈阜一帶捻股掃除毋再任意玩誤致干重咎將此由六百里諭知僧格林沁官文多隆阿嚴樹森劉蓉英桂張之萬毛昶熙李雲麟並傳諭張集馨知之○以赴任遲延革雲南布政使蕭浚蘭等職○廣廣東鄉試中額一名增城三水花縣學額各一名江西萬載縣八名客籍二名○甲寅僧格林沁奏臣於蒙城解圍後派總兵陳國瑞前往下蔡等處相機辦理據前獲解營之苗傑開供稱情願獻出下蔡壽州等處以贖前罪復據陳國瑞面稱帶領該犯前往藉可迅速收復當卽

准令鎖押帶往以作嚮導其餘張建猷等犯均於訊明後正法十月三十日臣復調隊進攻西洋集該逆仍敢拌死拒守我軍奮力攻入搜殺賊匪三千餘名生擒匪首葛春元等正法臣卽移紮西洋集其渦河以南葛家圩一帶從逆圩寨經副都統恆齡等勦撫並施各寨咸知反正收復賊圩十處惟劉家集有匪麇聚恆齡見已移兵前往酌辦至翼長蘇克金等勦辦石弓山一帶擒匪據報十月二十七日收撫張家樓等三圩該處附近尙有數圩爲擒首項盤率黨占踞二十九日守備李加膺稟稱李大箇子魏羣兒等懇求投誠並稱情願帶隊進攻項盤所踞等圩查訊該二犯尙係誠心歸正應准免死立功其魏羣兒所管十寨李大箇子所管十六寨均已一律薙髮十一月初三日該翼長帶領馬步及魏羣兒李大箇子等降眾進攻石弓山賊寨該匪堅伏不出其迤東耿家

樓等六圩均已投誠等語臣商令

瑞於初四日帶領翼長舒通

額等馬步各隊前往攻取以期早就肅清其陳國瑞一軍節據稟報派總兵宋慶於十月二十九日行抵苗家老寨詎苗添磬苗希林等先期帶領餘黨千餘向下蔡逃竄苗沛霖妻子均已自盡我軍搜捕苗姓二十餘人副將張從龍駐紮該寨宋慶等赴下蔡攻取苗添磬等見官軍追至又向西逃遁我軍入圩宋慶卽駐下蔡派副將康錦文等帶同苗憬開過河攻取壽州又派弁收復潁上正陽一帶各圩十一月初一日我軍行抵壽州苗逆所派守壽州之李萬春見我軍已到並有苗憬開等同往卽開門迎接入城當將壽州收復張從龍等旋又會同團練攻破賊黨童維翰老巢並截殺苗黨陳太和等百餘名生擒苗希年父子二人押往潁上令其獻出城地等情惟稱初一日收復壽城後初三日有李營馬步

大隊進城卽殺守門勇丁五名經我軍迎敵將該隊逐出城外又稱初三日李世忠督兵圍攻下蔡以宋慶不肯讓給調隊攻打而宋慶之軍亦出隊迎敵將其擊退李隊遂往下蔡附近尙未撤隊各情臣接閱不勝詫異查官軍剿賊原爲除暴安良似此貪功互鬪尙復成何事體當經札飭陳國瑞親往下蔡壽州會合李世忠妥爲彈壓毋滋事端復咨會撫臣唐訓方親往各該處撥兵駐守彈壓兵勇及詳查啟釁緣由俟查覆到日酌覈辦理見惟穎上等處尙未克復仍須督飭官軍次第攻剿迅掃餘氛 上諭內閣僧格林沁奏攻克西洋集賊寨及收復下蔡壽州攻克苗家老寨一摺辦理甚爲得手仍著僧格林沁等督飭各軍乘勝將穎上等處一律克復肅清皖境毋畱餘孽○諭議政王軍機大臣等僧格林沁大軍 力解蒙圍陣斬首逆後乘勝進兵收復壽州下蔡苗家

老巢勢如破竹惟潁上正陽等處尙未克復自應一氣掃蕩廓清  
全淮著僧格林沁督飭陳國瑞宋慶等將潁上正陽一帶賊圩趕  
緊攻克盡行平毀其已經收復各地方並著曾國藩唐訓方慎選  
賢守令妥爲安輯務令各務農業將荒廢地畝次第耕種俾衣食  
有資不至流而爲匪方爲妥善李大箇子等投誠一節及苗憬開  
等獻出壽州是否誠心反正抑係暫時爲免死之計若輩狼子野  
心難保不復萌反側著僧格林沁嚴飭陳國瑞等妥爲鈐束毋稍  
大意昨據唐訓方奏苗添罄宋憬詩等餘眾不滿三千向西南竄  
去等語此次僧格林沁摺內亦稱苗添罄等向西逃遁宋憬詩是  
否在內見在竄往何處著僧格林沁會同曾國藩唐訓方各派兵弁嚴  
密兜拏毋令免脫其駐守潁六之成大吉等軍著曾國藩嚴飭其  
搜剿圩賊盡力協助壽州收復後李世忠所部進城擅殺守門勇



丁五名又於圍攻下蔡時因宋慶不肯讓給調隊攻打爭功尋覺實屬不成事體僧格林沁見派陳國瑞前往彈壓卽著該親王會同曾國藩唐訓方將啟釁根由秉公查辦捻首李大箇子魏羣兒等雖已投誠而項盤尙未殄滅深恐被勦情急東竄徐宿一帶著吳棠嚴飭在事員弁實力防勦不得稍有疏虞杭州將軍雖已簡放國瑞見派副都統明興署理暫可毋庸到任福州副都統一缺將軍英桂到後亦可兼顧蘇克金到任亦可暫緩也將此由六百里各諭令知之○以林鴻年爲雲南布政使劉嶽昭爲雲南按察使記名按察使○予江蘇陣亡遊擊周學林等祭葬世職○丙辰諭議政王軍機大臣等前因盛京東邊一帶曠閒山場流民聚眾私墾諭令王明恩合嚴密訪查妥議具奏茲據王明奏稱自東邊門外至渾江東西寬百餘里至二三百里不等南北斜長約一千餘里

多有墾田建房栽種伐木等事自渾江至綏江東西寬數十里至三四百里不等南北斜長約二千餘里其間各項營生與前略同然人皆流徙聚集甚眾已有建廟演戲立會團練通傳轉牌等語該處地方遼闊山樹重深匪民易於匿處以致屯聚日多且性情頑梗固知繩墨其屯聚地方又多與朝鮮邊境毗連所有防範事宜均須詳愼妥協不可稍涉大意著該將軍隨時查看情形總期於潛移默化之中寓杜漸防微之意以期周密而昭慎重玉明身任將軍於一切地方公事軍務總當力求整頓加意激勸前奏榆樹台剿賊失利一摺內稱佐領慶吉等及所帶槍兵多有被困陣亡者何以至今尚未查明請卹殊屬曠曠著卽將是日陣亡之文武官員兵丁等迅速查明分別奏咨請卹將此諭令知之○李鴻章奏李鶴章劉銘傳等軍擊退無錫大股援賊並踏毀三里街萬

壽橋賊壘後劉銘傳卽回堰橋原營十月十八日出剿斗門秦巷一帶踞逆賊盡遁高橋之惠山孟里等處高橋西通常州南扼宜興賊以礮船二十餘隻守河口河東築土壘木卡十餘處劉銘傳商調王東華水師於二十日會合陸軍至高橋二里外賊卽來迎我軍分路鈔擊斃賊千餘名賊棄營逃奔二十一日賊萬餘列隊高橋王東華以大礮轟擊徐得勝等由西斗門出剿賊始遁去龍山西三里墩營匪眾亦遁護逆自常州來援見高橋已阻折向西斗門沿河紮卡僞吳王率賊二萬餘與護逆合援二十三日圍撲萬壽橋營盤一股由橫山牽掣青陽官軍另股由錢周村渡河撲石撞橋劉銘傳令徐得勝等固守毋出自帶三營堵錢周村橋口調唐殿魁耆貴二營折回堰橋以顧後路二十四五等日該逆疊撲西萬壽橋營盤均經擊敗二十六日忠逆帶大股二萬餘由蘇

州西路繞來擁撲萬壽橋離我軍里許築壘劉銘傳督飭各軍分三路進擊賊大潰走追殺數里擒斬二千餘人僞忠王率其黨遁回常州高橋大河賊船數百號均向常州一路而走李鶴章聞蘇城已克令郭松林等進勦新安望亭各賊壘二十六日我軍進至新安壘賊迎拒郭松林等率隊衝殺該逆棄壘狂奔追及望亭並將該處賊壘踏平生擒賊匪七百餘名奪獲賊船三十餘隻南門援賊出城亦爲吳建瀛擊退是日周盛波張樹聲等又擊退東北門之賊奪石卡一座木卡四座臣查忠逆自蘇城遁出仍糾護逆回援無錫據獲賊供稱忠護二逆皆欲速援金陵再圖竄路見在蘇錫之交一律肅清高橋旣克西北衝要已斷但賊匪搶有小輪船一隻往來衝突恐由常州孟河口等處出江繞竄圖援金陵臣已飛咨都興阿曾國荃吳全美等一體嚴防兜勦李鶴章見飭郭

松林進紮無錫南門周盛波移紮北門俟惠山紮定即可合圍與  
劉銘傳等併力攻城又奏蘇州逆首僞王郅雲官伍貴汶汪安均  
周汶佳僞天將范啟發張大洲汪懷武汪有爲等因官軍圍攻緊  
急乞降內應該酋等願望太奢獻城後遂占踞閶胥盤齊四門於  
街巷各口堆石置卡隱然樹敵又添招蘇城附近賊黨陸續進城  
堅求准立二十營並乞保奏總兵副將官職其挾眾要求之狀種  
種堪虞臣思受降如受敵若任其擁眾盤踞必致貽患無窮況郅  
雲官等積歲巨酋在賊中封至僞王天將其罪惡已不可赦今圍  
困始降毫無悔罪之意仍多非分之求將來斷不能遂其所欲卽  
斷不能無反覆因傳令該酋等八人來營謁見多方開導冀其解  
散脅眾再爲籲懇恩施詎該酋等堅不應允郅雲官並未薙髮維  
時忠逆李秀城尙在望亭距蘇甚近郅雲官等皆係忠逆黨與誠

恐復生他變不如立斷當幾萬不得已登時將該僞天王天將等  
駢誅派程學啟督隊入城搜捕逆黨於是降眾二十萬咸繳軍器  
乞降遣散臣復派妥弁挑畱精銳二千人分置各營其餘陸續資  
遣安置臣卽於二十九日入城駐守督率官紳分投撫恤人心大  
定上諭李鴻章奏無錫官軍連克高橋望亭等賊壘擊退各股  
援賊漸次合圍一摺見在蘇錫之交雖已肅清而賊情狡譎難保  
不拌死復來水陸各路恣其衝撲李鴻章仍當督飭劉銘傳等各  
軍加意嚴防並飭郭松林周盛波穩紮穩進一俟無錫南北兩門  
及惠山紮定合圍後卽與劉銘傳等併力進攻速復錫城其賊以  
輪船由常州之孟河口等處出江繞竄圖援金陵亦在意中並著  
曾國藩令曾國荃與都興阿於南北兩岸防江各水師嚴爲之備  
無稍疏虞李鴻章另片奏蘇州乞降內應之賊目邵雲官等降眾

二十餘萬於投誠後仍復挾眾種種要求恐貽後患傳令該降酋等八人來營多方開導堅不允從當將邵雲官等立予駢誅見在降眾人等業已繳呈軍械乞就遣散李鴻章卽日入城駐守督率官紳分投撫卹人心大定散遣降眾二十餘萬人數過多著李鴻章妥爲籌辦毋稍大意一面詳悉奏聞將此由六百里各諭令知之○諭官文嚴樹森奏湖北漢鎮地方久爲髮捻垂涎該鎮前濱大江東西及後湖沿隄一帶處處可達皖豫春冬水涸無險可守見就該鎮地勢三面築堡開濠設立礮臺以補長江之險所需經費該鎮商民皆願抽捐房租見於十月興工開濠一面購備木椿石塊築設堡牆礮臺責令於來年春閒一律完竣等語所籌尙屬周妥卽著照所擬辦理所稱各國洋行及所買地基擬卽一併包入外國商民藉資捍衛該洋人自無不欣然樂從惟此事總須內

地官員自爲經理著官文嚴樹森妥籌辦理將此由四百里諭令知之○丁巳李鴻章奏無錫官軍攻克高橋等處賊壘擊退忠護各股援逆乘勝合圍逆首僞潮王黃子澐父子率眾六七萬人矢志死守傍運河圍築土城各門橋口均以四五大營護之槍礮極密李鶴章親赴各門來往督攻十一月初一日周盛波北門獲勝燒沈礮船十餘隻民船百餘號郭松林等攻破惠山石卡二道擒斬悍賊二千餘名是夜李鶴章令丁日昌手然開花礮燒城屋數處賊中驚亂復親督張樹聲等攻破亭子橋口賊營一座殺賊數百名初二日張樹聲等攻破東門土營四座符信等乘勝破其土城周盛波等攻破北門土營四座郭松林攻破南門土營五座張光泰等礮船又合擊西門之賊奪礮船八十餘隻民船七八百隻郭松林黃中元又破其西南二營李鶴章見城上賊漸移動飛催



東北兩軍登城自赴南門令郭松林等率眾爬城與黃翼升分督水陸四門豎梯一擁而登賊全走向東西城頭放槍死抵張樹珊等復從東西門橫阻而登賊卽下城巷戰潮逆自率老賊五千名出北門經周盛波擊斬三千餘級轉由西門而遁周壽昌等領隊截殺先破城外五環洞橋賊營該逆路斷衝突十餘次周壽昌縱馬手擒僞潮王黃子澹餘賊四散悉追斬之潮逆之子仍在城領眾抗拒又被郭松林擒獲李鶴章速登南門城頭城中棄械跪降者數萬人其餘悉數擒斬逸出之賊經水師截殺數百名又被劉銘傳萬壽橋一軍攔擊其竄往常州者無多計生擒潮逆父子及大小賊目五百餘人擒斬溺斃賊眾二萬餘人無錫金匱縣城遂於是日克復實足以伸天討而快人心臣查無錫爲蘇常咽喉水陸關鍵自李鶴章劉銘傳等軍由江陰進紮忠侍各逆糾大股

悍賊回援冀解蘇圍日夕搏戰我軍儻一移動卽爲所乘幸各將士堅苦相持移營進逼旋擊退忠侍各股俾攻取蘇城之軍不受牽掣其爲功於大局非淺迨忠逆由蘇遁出復糾常州護逆拌死撲犯潮逆亦立意死守我軍兩次擊退忠逆乃得直抵城下合圍猛攻迅速奏效各將士苦戰三月之久先後大小百餘仗實屬著有勞績除臣弟李鶴章分應效力不敢仰邀獎敘外提督劉銘傳郭松林血性忠勇摧鋒陷陣請旨優加獎賞所有在事尤爲出力各員相應開列請旨分別給予獎勵又奏僞忠王李秀城自十年春間攻破金陵長圍疊陷蘇常杭嘉湖各處上竄江西湖北先後裹脅潰兵游匪眾以百萬計分置各城又盡得東南財賦之區日以鴟張幾至不可收拾自去歲屢戰屢敗及投降各城精銳散亡不下二十餘萬今年春夏間竄皖北失利經上游官軍截殺解散

又十數萬眾其自九洑洲過江僅存四五萬人維時僞天王驚惶失措猶賴李秀城回金陵主持守局而忠逆以蘇州爲分地事急回援其部眾悍酋布滿蘇浙總以踞守蘇省之僞暮王譚紹洸僞納王邵雲官踞守杭州之僞聽王陳炳汶僞歸王鄧沆明踞守無錫之僞潮王黃子澂爲最該酋等各擁眾數萬與臣軍搏戰較久謀勇兇狡實倍他賊仰賴 皇上威德遠布天奪其魄藉各路官軍合力驅除計蘇州之捷剿除僞暮王等解散約二十萬人無錫之捷剿除僞潮王父子擒斬解散約五萬人金陵浙江各軍擒殺解散之數更不勝計忠逆黨與已孤巢穴已失據擒賊僉供該逆踉蹌西走隨行僅兩萬餘人將赴金陵設法解圍儻無法解救則挾僞天王洪秀全及其眷屬由浙皖交界上竄江西福建以尋回粵之路見在曾國藩派兵回防江西左宗棠派兵分截皖南固已

豫有戒備但使該逆不再竄踞城池勦滅較易至常州僞護王陳  
坤書一股約眾數萬能守而不耐戰溧陽僞侍王李侍賢戰守俱  
悍人數尙多皆聽忠逆爲進止杭州之聽逆陳炳汶係安徽人歸  
逆鄧洸明係湖南人聞忠逆有回粵之志多不願從嘉湖蓄糧甚  
富尙須死守幸各路兵力皆强布置甚穩如金陵杭州再有一處  
得手賊勢自必瓦解臣卽日馳赴無錫籌度分布進取之方擬令  
程學啟會同李朝斌劉秉璋潘鼎新水陸各軍由平望太湖平湖  
乍浦兜勦浙西之賊冀與左宗棠蔣益澧之軍前後夾擊李鶴章  
劉銘傳各軍相機進取常州宜興兜勦蘇境之賊冀與曾國荃鮑  
超之軍前後夾擊欲分各路賊勢藉固蘇滬藩籬總須慎之又慎  
斷不敢恃勝而驕自取顛覆惟各軍自春徂冬幾於無日不接仗  
無時不移營傷亡病瘵纍纍相屬卽能戰之將亦多有積勞致病

天氣苦寒須略休養臣惟有體察軍情相機籌辦 上諭議政王

軍機大臣等李鴻章奏官軍克復無錫金匱縣城一摺暨陳近日賊情及籌辦大略情形一片覽奏甚爲嘉悅李鶴章能與其兄同心勦力爲國宣勤此次未行破格之獎正爲該員係李鴻章之弟以示該撫功不自私俾得推勞將士鼓舞眾心李鶴章當益自勉勵指日常郡金陵次第奏捷克成全功更當與劉銘傳郭松林等同膺懋賞至所稱忠逆李秀城踉蹌西走隨行僅止兩萬餘人將赴金陵設法解圍計不得施則挾洪逆並其母妻眷屬由浙皖交界竄走江閩以尋回粵之路其常州護逆陳坤書不甚耐戰杭州之陳炳汶鄧洸明聞忠逆勢敗思歸多不願從惟溧陽侍逆李侍賢戰守俱悍且與忠逆同惡相結而陳鄧等逆酋以嘉湖蓄糧甚多必須死守幸官軍各路布局皆穩金陵杭州再有一處得手賊

更瓦解該撫擬卽日馳赴錫城籌布進取令程學啟會同李朝斌  
劉秉璋潘鼎新水陸各軍由平望太湖乍浦兜剿浙省之賊冀與  
左宗棠蔣益澧之軍前後夾擊李鶴章劉銘傳各軍進圖常州宜  
興兜剿蘇境之賊冀與曾國荃鮑超之軍前後夾擊以分各路賊  
勢而固蘇滬藩籬所籌均極周至卽著曾國藩飭令曾國荃與左  
宗棠聯絡進止督率各路將領與李鴻章部勒諸軍相爲策應相  
機進取如賊欲由浙皖毗境竄出江閩各路或由乍浦海口登船  
逃逸並著曾國藩左宗棠豫籌堵截沈葆楨見已力疾視事其於  
江省饒信等防經營有素此時尤當嚴密設防不可稍設疏虞並  
與曾國藩左宗棠隨時函商布置所有江忠義席寶田等軍見在  
是否尙駐贛饒境內亟應妥籌調度以赴事機曾國藩前奏鮑超  
及王可陞等軍分駐東壩溧水高淳及皖南甯池等屬左宗棠前

奏劉典王開琳各軍以次由孝豐等處進發兼顧皖防諒皆各有成算在胸與李鴻章所籌定相符合金陵漸已合圍杭湖亦已分軍進擣時勢均有可圖該督撫等務須聯絡一氣層層進逼萬不可稍涉遷延惟賊勢雖衰而人數尙眾總宜力求穩慎以保萬全縱或各城收復稍稽斷不可令李秀城潰圍逃逸務將此賊就地芟除絕其根株免致竄擾完善辦理更形費手李鴻章所部各軍因天氣苦寒多有積勞致病須略加休養卽著加意拊循養蓄精銳慎重進取可也將此由六百里各諭令知之○諭富明阿奏近日招撫情形並將援蒙之揚軍撤回籌辦皖北善後一摺總兵詹啟綸等軍攻克歐王堡賊圩後四路兜剿連日收撫一百數十圩參將王品裕督同投誠練眾詹文魁等拏獲苗逆家屬並收撫民圩十一處以上反正各圩應如何加意撫循妥爲控制之處著唐

訓方督飭按察使英翰相機辦理毋令再萌反側逆屬苗徐氏逆子苗連生業經解交僧格林沁軍營著該親王訊明辦理蘇常各軍均極得手髮逆紛紛擁至江邊深恐鋌走北岸揚軍單薄不敷分防僧格林沁富明阿將揚營援蒙之軍先行撤回三千五百人令詹啟綸統帶仍回揚州原防所籌甚是本日據李鴻章奏無錫業已克復南岸攻勦愈緊北岸防務愈形喫重若稍有疏虞致令金陵常州等處之賊竄入江北完善之區卽南岸疊奏捷音亦復所得不償所失著都興阿富明阿吳棠分督水陸各軍嚴密堵禦力遏該逆北渡之路不可稍涉大意皖北之患實由民圩過多練總權大所致各國練總文職保至府道以上武職保至二三品仗勢自豪不但生殺之權地方官不能專主甚至鄉井小民止知有練總之尊不知有官長之令積習日久黨與旣多勢益強橫有一



大練總而管至百數十圩者稍有所拂卽藉尋仇爲名糾眾燒殺如苗沛霖之釀成巨患率皆由此若不受籌善後隱弭此患恐跋扈桀驚之徒暗伏亂萌又蹈苗逆覆轍著僧格林沁將如何遣散各處民圩漸削練總之權俾團練無從抗官之處悉心籌畫妥爲辦理並著曾國藩唐訓方督飭地方文武力加整頓此後該處民練總須官爲督辦毋再畀權練總致成尾大不掉之勢方爲妥善將此由六百里各諭令知之○戊午諭議政王軍機大臣等都興阿奏逆匪回竄北岸見經布置截剿馮子材等奏南路潰賊併注鎮防連日統籌戰守並諫壁等處防剿情形各摺片蘇州無錫各城先後克復忠侍各逆竄併丹句一帶蠡屯蟻聚約有六七萬眾賊勢如羣川赴壑鎮防實首當其衝馮子材等調張文德所部四營卽日回防以厚兵力並令田宗揚一軍歸併丹徒駐紮聯絡東

南聲勢所籌均尙周妥卽著督飭在防各軍實力扼守以靜待動以逸待勞庶戰守皆有把握不至爲窮寇所乘鮑超全軍見紮東壩此時溧水已復自應進圖句容以斷忠逆援救金陵之路著曾國藩飭令該提督迅速進兵將句容踞逆殲除該逆不能回援金陵勢必猛撲京口亟圖一逞如馮子材等兵力不敷分布並著曾國藩飭令曾國荃撥兵協助可使金陵暫緩合圍斷不可令鎮城有失都興阿片內有探聞忠逆欲合護侍各逆乘火輪船礮船竄擾江陰並欲北渡圖解金陵之圍等語江陰見係駱國忠駐守其兵力是否足資抵禦應否添兵協助著李鴻章迅籌布置嚴飭防江師船扼剿並防其由江陰口岸渡江而北江北防務甚關緊要都興阿當遵疊次諭旨督飭水師嚴防北竄毋得稍有疏虞忠逆旣竄丹陽城內常郡守禦自必空虛李鴻章昨奏兵勇血戰經年

擬暫爲休養惟機有可乘時不可失著該撫揀擇軍鋒乘勝前進如能一股攻克則丹句之賊勢必望風瓦解想李鴻章必能相機辦理籌畫萬全也將此由六百里各諭令知之○諭左宗棠奏克復甯波等府縣英法領事夏福禮等九員助剿出力請旨嘉獎並由該督傳旨賞給物件等語英國領事夏福禮總兵哇樂德克都司陂格樂繡譯官有雅芝兵船醫官參將銜伊爾雲水師都司費達士法國參將權授中國兵官德克碑稅務司日意格教主田雷思上年隨同官軍克復甯波各城實屬奮勇出力宜加賞賚以示嘉獎各國助剿出力獎勵有僅傳旨嘉獎者有行知各該國主自行給獎者有賞銀牌者有賞銀兩者其功績大小不同故獎賞亦厚薄有別日前李鴻章奏克復蘇州省城戈登尤爲出力曾經降旨賞給頭等功牌並銀一萬兩聞此外另由李鴻章賞賚銀七萬

兩浙省助剿之英法領事等官夏福禮等九員協同克復甯波慈谿等城甚爲出力惟究非克省可比若賞給銀兩恐以戈登爲比實難爲繼若賞給物件過優恐戈登又有藉口緣日前陣亡之勒伯勒東曾賞貂皮英國駐京公使曾援以爲戈登請經總理衙門告知係因陣亡而賞戈登實非其比該使亦卽中止左宗棠所請傳旨賞給該員等物件是否已有成說惟未明言何項賞件擬難懸擬著將各該員等勞績細加察覈應如何分別賞件頒發一面奏聞並摘錄此旨內嘉獎數語宣示至功牌爲外國人所重無論或賞銀兩或賞物件均不可無功牌功牌如外國寶星之類崇厚李鴻章並曾製造有式可仿照辦理也該督曾否進紮富陽近日軍情並著隨時報聞以慰廑繫將此由五百里諭令知之○予浙江陣亡光祿寺署正潘治安知縣陳景祺祭葬世職○己未諭議

政王軍機大臣等張凱嵩奏容縣官軍埽蕩匪巢並東師越境會  
剿收復岑溪縣城各摺片廣西官軍於收復容縣後乘勝攻克大  
化賊巢生擒范亞音之弟范六並將餘匪分別剿撫容境大致肅  
清惟首逆范亞音在逃未獲必應趕緊躡緝毋令免脫其由岑溪  
逃往藤縣糯崗之匪喘息一定亦恐滋蔓難圖著毛鴻賓郭嵩燾  
張凱嵩督飭兩省官軍分投搜捕追躡務令渠魁就縛萌孽悉除  
以靖疆圉各路投誠之人必須地方官妥爲鈴束並著張凱嵩嚴  
飭覃遠璫盧定勳等督率官紳設局立團悉心查辦總期撫綏安  
定後患不萌方爲妥善前據毛鴻賓奏李幅猷一股竄至廣西懷  
集縣之石塋地方樹柵屯糧意圖久踞茲據張凱嵩奏署懷集縣  
知縣況逢春等督團截殺殲匪甚多復會合東省勇練填壕焚柵  
槍礮齊施該逆腹背受敵奪路狂竄僅餘殘匪一二十人由陽山

之白帶寨岡竄去見有廣東兵勇趕到督隊跟追其前竄開泰縣屬一股忽於十月十一日自焚其巢全股突向永從縣竄去等語李幅猷股匪經此次痛創之後餘黨尙有一二千人亟應各省合兵夾擊聚而殲旃著毛鴻賓勞崇光張亮基郭嵩燾惲世臨等各飭在事員弁實力堵截嚴密兜拏或懸賞購獲首逆或設法解散脅從務將積年巨憝一股殲除毋令不突狼奔餘燼復熾方能永靖邊陲至貴州永從縣境與廣西之羅城接壤若由永城走古州繞出荔波獨山可入廣西之河池思恩等州縣此股逆匪本有趨粵之志自應扼要嚴防著勞崇光等迅派兵勇迎頭截剿張凱嵩飭令副將黃仲慶等探明賊蹤所向嚴密堵剿毋稍疏虞將此由六百里各諭令知之○庚申諭內閣惲世臨奏李逆股匪窮蹙投誠生擒首逆一摺李幅猷股匪自遁入廣東連陽山內之石瑩坑

尾一帶負隅固守經福建按察使張運蘭等督率湘軍於十月十一十四等日馳抵寨岡石塋等處進剿賊目二十餘人詣營乞撫十七日賊目等將石塋坑尾賊壘概行焚毀呈繳軍械旗幟偽印偽照多件除積年悍賊偽旗帥向日鼎等三十餘名業經正法外其乞降之餘黨三千餘人分別遣散安插首逆李幅猷逃至連州所屬之鐵杭復經兵勇奮力衝殺悉數擒縛又拏獲偽軍略曾貴伍福勝二名一併解赴廣東訊明辦理連陽地方一律肅清辦理甚爲認真著憚世臨飭令張運蘭等乘此聲威將逃竄餘匪會同粵黔各軍合力殲除毋畱餘孽○諭前任安徽巡撫李續宜由諸生帶勇剿賊忠勇奮發沈毅有爲與其兄原任浙江布政使李續賓戮力行間受 文宗顯皇帝特達之知洊擢封圻轉戰湘鄂江皖數省屢克名城戰功卓著咸豐十年間逆匪石達開竄擾湖南

該員統師援勦力解寶慶之圍厥功尤偉朕御極後調任湖北安徽巡撫辦理一切深合機宜上年因丁母憂賞假回籍治喪本年復准開缺專辦皖北軍務旋因患病節次賞假在籍調理方冀漸起沈疴長資倚任茲聞溘逝悼惜殊深李績宜著加恩照總督軍營病故例賜卹任內一切處分悉予開復應得卹典該衙門察例具奏並准於湖南湖北安徽省城寶慶府城及原籍湘鄉縣城建立專祠其歷年戰績著官文曾國藩詳查具奏宣付史館伊父李登勝著賞給人獲四兩交憚世臨頒給祇領並著該地方官以時存問伊子一人尙幼著俟及歲時由該部帶領引見以示篤念耄臣錫類推恩至意尋予祭葬諡勇毅○諭議政王軍機大臣等劉長佑奏報回省日期暨搜捕餘匪請保出力員弁各摺片直隸地方見就肅清復將屢叛屢降之積匪楊朋嶺伏法其元城縣通賊



之革生錢洛文等亦經搜捕誅戮辦理甚爲妥協直境匪徒經此次剿除痛懲理宜淨絕根株究竟各屬見尙有無潛藏巨慝仍著該督隨時訪察辦理毋稍懈弛劉長佑見已回省所有地方善後一切應辦事宜著卽認真率屬妥籌辦理俟有就緒再行奏請來見候旨遵行至另片奏直省吏治營伍均多廢弛所擬整頓大概情形自應一切破除情面整躬督率辦理但須事事務求實效在力行不在多言至欲訪求公正紳士諮以地方利弊得失惟在該督悉心延攬以資考鏡古人采及芻蕘隨事隨時皆資訪察固不獨於紳士爲然果得地方公正紳士自足以通達輿情維持治理也將此諭令知之○諭都興阿奏擊剿龍虎埭竄賊獲勝劉巷降眾潰圍逃出見飭稽查情形一摺蘇垣敗賊竄擾丹陽一帶突至江邊經總兵李起高等軍擊退劉巷朱家圩等處又有賊眾數千

意圖渡江撲犯太平洲旋見鎮海庵對江之龍虎埭有賊馬步隊一二千人馳驟而來我軍撥隊扼險登岸迎擊賊始回竄劉巷以下該逆窮極思竄鋌而走險旁擾鎮城北犯揚防均屬意中之事著都興阿富明阿馮子材魁玉懷遵前旨督飭各軍扼要布置嚴密堵禦如鎮營兵力不敷防剿並著都興阿撥兵策應總之揚州鎮江兩軍雖營分南北實則同辦一事必須聯絡一氣互爲聲援方不至爲賊所乘不得稍分畛域致誤戎機昨據馮子材等奏九月間常州逃出難民賀姓等約五六百人由孩溪諫壁赴丹徒柏家橋卡外投誠時餘千賊壘出賊追逐總兵田宗揚往援賊已回遁當將此起難民交招撫局給賞遣散茲據都興阿奏鎮軍投誠逆首張九元爲賊所覺悉力圍攻該降眾稟乞田宗揚往援因該卡子藥俱盡力不能支止得帶隊隨同官兵衝出當飭李起高及

丹徒縣知縣馮渭查明止准於十一月初八一日北渡初九日卽行禁止等語與馮子材等所奏均不相符是否該營稟報不實以致彼此兩歧著都興阿富明阿馮子材魁玉查明具奏其未經衝出之降眾自必陸續北來都興阿見飭副將孫文友等於沿江過渡地方設局稽查並派侍衛訥楞額挑馬隊百名前往沿江一帶彈壓卽著飭令各該員認真盤詰以免奸匪溷迹此項降眾應如何飭令地方官分別遣散設法安插之處著李鴻章妥爲辦理將此由六百里各諭令知之○諭吳棠奏徐宿援蒙官軍回顧本境一摺總兵姚廣武一軍於十月二十八日攻克宿境之宋家圩將擒首宋小喜擒獲正法見經僧格林沁飭令該總兵帶隊回宿清理宿西各擒圩卽著吳棠督飭姚廣武迅將宿西伏莽次第埽除以靖地方將此由五百里諭令知之○諭惲世臨奏李幅猷股匪

窮蹙投誠首逆就獲並援剿黎平情形一摺李幅猷以石逆餘黨著名兇悍見經官軍拏獲解赴廣東卽著毛鴻賓郭嵩燾將該犯等三名訊明後盡法懲治該逆全股前據楚粵兩省奏報實有三四萬之眾此次憚世臨所稱餘眾僅三千餘人其大股究歸何所且以積年竄擾蜀黔楚粵悍賊見雖窮蹙乞降難保不陰謀反側憚世臨所稱分別遣散安插之處能否不貽患將來著毛鴻賓憚世臨郭嵩燾飭令地方官及帶兵員弁實力搜捕妥籌辦理其已降之眾如有叵測卽當一律剿除以清後患至該逆前竄開泰縣屬一股昨據張凱嵩奏全向永從縣竄去又稱李幅猷與其弟李復忠面議投誠遲疑未決意欲他竄等語此次憚世臨奏稱該逆分股李七竄擾黎平洪州所等處復竄至下溫攻陷成應洪營盤成應洪不知下落見經周洪印等追剿復退竄宰宰四寨地方等

語所稱李七是否卽係李復忠其宰窖四寨之賊是否卽竄往永從之股分擾蔓延見在李幅猷旣經生擒該逆黨與自己聞風膽落正宜乘此聲威合黔粵楚省官軍掃清全股以靖邊圉而免蔓延著勞崇光張亮基惲世臨張凱嵩懷遵前旨督飭各該省官軍會合兜剿毋得藉口邊防株守境內儻意存觀望任令匪蹤鋌走將來竄往何路肆擾卽將何省會剿不力之員弁從重治罪決不寬貸此次成應洪旣與周洪印約會進攻何以該逆竄向洪州下溫攻陷營盤未見周洪印接應難保非該副將心存畛域坐視不援卽著惲世臨查明參奏成應洪下落並著勞崇光張亮基查明辦理將此由六百里各諭令知之○諭閩敬銘奏東昌布置釐定見擬回省並訪聞邱縣鄉民張本功等聚眾抗糧拏獲正法各摺片閩敬銘自八月閒督軍駐紮東昌迄今將及三月督率各州縣

搜拏匪黨三千數百名正法民情漸知儆懼見令定安等軍會同地方官巡緝餘匪實行保甲並責成署東昌守曹丙輝認真整飭其毗連徐宿及單縣馬良集並韓莊牯均已派員帶兵扼守仍著督飭認真辦理以靖地方李大箇子股匪前據僧格林沁奏報該匪首到營投誠惟項盤等股仍行負固東省與徐宿毗境並著閻敬銘嚴飭派出之王心安等軍慎密防維毋令捻蹤闖入閭敬銘見屈服閱本日業經降旨補授山東巡撫著於回省後即將察吏整軍及該省應辦各件逐一實心講求力加整頓俾地方日有起色方爲不負委任邱縣鄉民張本功等聚集匪眾多人意圖入城抗糧經該撫派調勇丁會同地方官將該匪首等緝拏正法辦理甚爲妥速東省地方彫敝民困未紓該大吏等固宜加意拊循惟此等不法匪徒膽敢糾眾抗官實爲法所難宥此外各州縣似此

者恐尙不少仍著切實訪拏懲辦以儆刁頑各屬黑團並著設法曉諭解散爲首匪犯嚴緝正法毋任一名漏網兗沂曹一帶伏莽尙多該撫擬諸務清釐明春出省前往巡查著照所擬妥爲辦理至淄川白蓮池等處隨同僧格林沁官軍剿匪出力官紳人等均係著有微勞惟僧格林沁前次請獎所部員弁人數無多原以賞功之典宜從覈實所有淄川等處隨同出力各員弁著閭敬銘擇尤彙保毋許冒濫將此諭令知之○諭多隆阿奏官軍收復山陽商境肅清並圍攻盤厓各路彙報軍情一摺此股賊匪竄走官軍追剿一及之於東崗再及之於富水關沿途斬獲而外究竟尙有若干見由西坪竄越豫境自應不分畛域踰境窮追藍斯明兵力未厚見在張總愚大股盤踞浙川尤虞其與藍逆一股勾合爲患復擾陝境多隆阿所奏飭令藍斯明嚴扼武關兼顧潼商一帶仍

恐不敷堵剿著卽懷遵前旨酌量分撥兵勇俾得越境進剿與豫省之軍前後夾擊張曜所部見已前往浙川防剿張之萬並派令葛承霖蔣希夷所帶湘楚各營前往協助前奏已將西坪竄來之匪擊退著卽嚴飭該總兵親督各軍與秦軍聯絡實力扼截張曜接仗一切情形張之萬切須隨時查察如果防剿不力徒爲紙上空談致令藍張二逆乘閒竄合仍復蔓延必惟張曜是問卽張之萬亦不能當茲重咎前因藍逆竄至商境與豫鄂均屬毗連曾經諭令官文嚴樹森卽飭鄖防之軍相機越剿此時賊蹤所向如須鄂軍相爲策應張之萬卽遵奉前旨飛咨鄂省鄖防兵勇會合圍剿毋失事機豫省此時東路稍紓其亳州一帶捻匪有偕格林沁大軍督剿張之萬卽當權衡緩急量移東路各軍以顧西圍該撫應否親赴西路以資巡察著卽酌量情形辦理多隆阿督攻盤屋



諒不難於得手務須迅速奏功毋爲一隅之地致牽全局雷正綰之軍已由靈臺前進並著迅飭陶茂林之軍速清汧隴轉戰而前與雷正綰會合甘境以厚兵力仍督令曹克忠埽除麟遊一帶餘匪進紮岐郿母稍稍滯其李雲麟所部疊經寄諭責令回軍援剿商南之賊該京堂旣已接奉此旨此時劉蓉曾否入陝仍未奏來何以如此濡遲漢南羣盜如毛劉蓉之軍如未入陝李雲麟一軍亦斷不能獨力削平商境肅清情形究復如何如或商潼賊勢尙重藍斯明一軍勢難獨支多隆阿仍遵前旨飛咨李雲麟回軍與藍斯明併力合剿並著該京堂星速返旆毋得藉詞避就自蹈愆尤劉蓉仍遵疊次諭旨速整軍威由青石關進紮以復漢疆並將陝南一路軍情詳細奏聞毋再延宕將此由六百里各諭令知之○諭多隆阿奏回匪勢窮乞撫並請將甘省兵勇統歸雷正綰調

遣熙麟專辦糧臺各等語陝省回匪蓄謀倡亂經多隆阿督軍痛加勦洗所有兇悍逆黨業已殲除殆盡見惟汧陽隴州麟遊尙有零星匪徒陶茂林由鳳翔進兵至汧陽交界地方回眾老幼婦女頂香跪地哭泣才撫該回眾既經畏威悔罪自可寬其一綫予以自新前經疊降諭旨准予良回投誠著多隆阿卽遵奉前旨妥爲辦理並刊刻謄黃徧行曉諭總令其將戕官踞城首惡捆獻其餘一切脅從概行赦宥則回眾可期漸次解散至甘肅固原州爲提督駐紮之所踞城者多係叛兵平涼回匪陷城戕官兇惡已甚該大臣當飭雷正綰等大申撻伐以懲兇頑俟匪勢窮蹙後再行分別招撫以期一勞永逸此外陝甘各路零星匪果有誠心悔禍自拔來歸者卽由該大臣設法安插毋稍大意雷正綰已抵甘省涇州地方著卽迅速前進痛掃逆氛所有該省兵勇均著歸雷正綰調

遭以一事權甘肅省垣緊要經理需人熙麟俟道路稍通卽應前赴省城見在省東一帶回匪已有雷正綰督軍勦辦熙麟著俟雷正綰進抵平涼後卽酌度情形馳赴蘭州整頓吏治並辦理河州狄道等處防勦事宜其雷正綰軍營糧臺卽由熙麟督飭所屬辦理設法接濟毋令缺乏將此由六百里各諭令知之○實授閩敬銘山東巡撫○辛酉諭議政王軍機大臣等玉明等奏疏防盜賊入境及緝賊潰退各員請旨參辦一摺滾地雷王五等股匪回竄吉林長春廳屬之靠山屯等處雖經玉明等催兵進勦見在並未將如何分路堵禦如何進兵搜勦妥籌辦法相機布置僅以接奉諭旨再行嚴催等詞草草塞責該將軍兼尹等身膺重寄似此漫不經心何以克副委任盜首齊秀齊海逃回江東玉明等卽聽其自然並未派兵躡緝亦未聲明江東係何處界址才寶善白凌阿

是否涸迹其中迄今時間數旬猶尙懵然未覺辦賊之法必須時  
加偵探洞悉賊情方能制賊死命若謂責成委員即可將就了事  
將來該匪無撲滅之期該將軍兼尹等自問能諉過卸責否耶景  
綸等自上月奏報賊匪回竄長春廳後未據續報剿辦情形賊竄  
吉林境內爲時已久未見景綸等速籌剿捕之方實屬不知緩急  
盛京與吉林同辦一事儻任令該逆日肆蔓延各該將軍兼尹等  
自問當得何罪著玉明景綸寶善麟瑞和潤德椿督飭派出各軍  
會師夾擊以期聚而殲旃各該將軍兼尹等務當嚴飭各軍聯絡  
一氣合力剿辦不得意存畛域互相推諉伯都訥副都統見派德  
楞額署理該員曾經身歷戎行如吉林帶兵無人應否卽令德楞  
額前往管帶著景綸麟瑞酌量辦理通判色勒業經革職其被參  
賄和釀亂各情著和潤德椿仍遵前旨將該員一併親提審訊據

實參辦王明等請頒黎樹城照磨印信已諭知禮部辦理照磨徐  
棠帶團前赴榆樹臺與賊接仗斷非攜印前往何以遂致貽失難  
保無該匪赴署搶劫情事著王明寶善和潤德椿查明據實具奏  
將此由五百里各諭令知之○諭前據僧格林沁奏攻克苗家老  
寨下蔡壽州等情形一摺內稱十一月初一日收復壽州初三日  
有李營大隊進城卽殺守城勇丁五名經我軍迎敵將該隊逐出  
城外擒獲五十餘人內有提督蔣立功一名又初三日李世忠督  
兵圍攻下蔡以宋慶不肯讓給調隊攻打宋慶之軍亦出隊迎敵  
將其擊退李隊遂往下蔡附近尙未撤隊經派陳國瑞親往下蔡  
等處會同李世忠妥爲彈壓並咨唐訓方詳查啟釁緣由酌辦等  
語昨又據吳棠奏李世忠查封西壩之鹽至數十萬包之多淮北  
鹽務疲敝悉由李世忠把持盤剝所致豫勝營勇李世忠向不發

給口糧全以擄掠爲事近在懷壽一帶焚掠之慘甚於盜賊自五河以下至滁州來安全椒天長及江浦六合等處經李世忠勇隊盤踞至六年之久州縣官不敢理事居民搬徙不敢還鄉以致田畝荆榛屋廬瓦礫數百里內人煙斷歇苗平而淮北竊安李存而淮南仍困請密飭僧格林沁曾國藩察看情形宜及僧格林沁等軍全在皖境之時早爲辦理各等語李世忠跋扈恣肆盤踞利源其勇隊分踞多縣不能約束騷擾病民終爲淮南巨患朝廷早已洞悉止以淮南之苗未除是以隱忍未發未幾而壽州下蔡等處無端尋釁又復見告以官軍業經得手處膽敢調隊攘奪攻打且殺害守門勇丁多名其居心叵測目無法紀可見僧格林沁所謂先事羈縻俟唐訓方查覆到日再行酌辦者諒已胸有定見未便明言今覽吳棠密陳皖北隱患一摺其辦法似尙周妥可行惟調

其所部實缺人員赴任一節宜加參酌著僧格林沁曾國藩吳棠  
唐訓方詳細密函籌商卽將李世忠調赴曾國藩軍營折以正言  
曉以大義令其隨營勦賊如彼以部下乏餉爲詞卽諭以官爲給  
餉毋令其再擅利權並勒令將所踞城池釐卡鹽利交出歸官一  
面於各城及要隘處所分撥隊伍嚴陣以待挑選其營中得力弁  
勇編成隊伍分隸楚南良將各營其部曲來自逆黨及著名兇惡  
者概予芟除遣散如李世忠俯首聽命卽可畱營錄用若敢抗不  
遵調則是顯然背叛僧格林沁等卽一面請旨革職一面聲罪致  
討斷不可稍存姑息僧格林沁等於計議將定未辦此事之先卽  
須豫爲貫注一氣同時並舉使其猝不及防不可稍有參差落後  
不能應手之處並往來密函籌商均各親自拆閱不准漏洩一字  
吳棠摺著鈔給僧格林沁曾國藩唐訓方閱看僧格林沁摺著摘

鈔給曾國藩閱看再本日據戶部奏淮北票鹽提充軍餉請分別截留以保正課一摺亦因皖徐平靖淮北銷路漸通亟宜將餉鹽分別截留以挽頽綱而裕正課著曾國藩嚴飭鹽運使忠廉設法遵照辦理喬松年於鹽務情形素所熟悉並著吳棠接此旨後將此旨內鹽務及戶部摺內應辦各條密行摘錄知照喬松年一體幫同辦理戶部摺並著鈔給僧格林沁曾國藩吳棠唐訓方閱看將此由六百里密諭僧格林沁曾國藩吳棠唐訓方並傳諭喬松年知之○諭張之萬奏藍逆由西坪入豫官軍兩面受敵旋復擊退情形各摺片藍逆大股麕至西坪經張曜整軍馳往策應見賊中藍旗紅旗花旗約有七八千之眾荆子關娘娘洞等處防兵均有腹背受敵之虞張總愚股匪稔知藍逆前來句約合股復屢向西北各路衝突情形岌岌可危幸張曜於重陽店擊退藍逆撲營



之賊追殺至花園關復直襲西坪賊壘攻其不備逆賊被創狂奔  
花園關之賊亦棄壘而逃逐北五十餘里該逆踉蹌西遁逃至陝  
西商南之青山口距荆子關八十餘里此股逆匪由漢中分股東  
趨勢本兇悍李雲麟初次於山陽接仗卽經失利旋以賊股東竄  
卽稱收復山陽率師西行置賊不顧反稱敗殘餘匪勢已窮蹙不  
難剿除而此次竄往西坪大股蟻聚蠡屯賊勢竟如此浩大若非  
張曜分投策應勉力支撐必致兩股合併秦豫俱受其害該京堂  
以知兵自任入陝剿賊尙無寸功卽居心如此巧猾工於趨避縱  
賊鄰封該京堂止知自爲身計獨不知國憲具在不能爲該京堂  
少恕耶見在藍逆雖遁往商南而其蓄意東趨冀與張總愚句合  
屢據奸細所供如繪勢將乘隙復來且商雒密邇潼關尤當派軍  
馳剿以杜蔓延著多隆阿懍遵疊次諭旨酌撥兵勇分扼潼商卽

飭藍斯明之軍繞前截擊李雲麟迅卽激發天良會合藍斯明實力勦除毋得縱賊紛竄致干重咎晉省沿河毗連潼商一帶英桂沈桂芬務卽激勵防河將士豫籌堵禦以杜奔軼張逆屢次突圍均經各營擊退張之萬前奏有就浙川山內圍逼坐困之語諒非徒託空言著卽檄飭葛承霖督率湘軍會合張曜各營乘藍逆甫退外賊旣斷之餘迅將張逆一股圍逼聚殲剋期蕆事一面飭令敖天印兩營嚴扼荆子關一帶以防藍逆再逞官文嚴樹森前經寄諭令其酌撥官軍入豫會勦豫鄂脅齒相依浙川與鄖陽尤爲密邇該督撫當不分畛域剋日撥兵入豫以免張逆潰圍出竄又將擾及鄂疆諒官文等必能領會機宜妥籌調撥也劉蓉並著懍遵疊諭星速進發籌復漢疆與多隆阿及各省援軍分籌進取毋稍宕延將此由六百里各諭令知之○諭駱秉章奏滇撫已抵川

省並訪聞滇省大概情形暨川省需餉孔殷請於來年續辦按糧  
津貼各一摺雲南巡撫賈洪詔於十月初七日行抵川省與駱秉  
章面籌進取適值潘鐸家丁周升到川當面詢悉滇省大概情形  
不特大理逆回杜汶秀等恃險負隅堅不受撫卽省回馬復初及  
楊振鵬等亦俱心懷叵測該督所陳賈洪詔如銳意輕進恐蹈潘  
鐸覆轍擬俟探明東昭一帶情形再由賈洪詔奏聞辦理自係實  
在情形滇南全省糜爛惟東昭尙屬完善且與川黔等省毗連爲  
入滇緊要門戶非有大員前往駐紮不足以資控制並恐該回逆  
等從而主心乘隙窺伺賈洪詔仍當懷遵前旨探明情形馳赴東  
昭與福陞會商妥辦督飭該處兵練嚴密防範毋稍疏懈並著駱  
秉章勞崇光將滇省應辦各事宜與賈洪詔籌商辦理至將來肅  
清滇省必須川黔等省合力進剿而川省見在兵分餉絀未能兼

顧勞崇光賈洪詔身任該省督撫責無旁貸萬不可稍存畏難之心致負委任駱秉章亦當不分畛域妥籌兼顧滇省在川官員並著賈洪詔飭令隨赴東昭以備差委毋任逗遛駱秉章奏川省需餉孔殷仍請於同治三年分續辦按糧津貼以資接濟著照所議督飭地方官妥爲辦理將此由五百里各諭令知之○諭張凱嵩奏容縣官軍生擒范逆一摺范亞音以積年巨憨流毒兩省自蔣澤春克復容縣後該逆竄往竇家寨地方經官軍密約內應立將范亞音生擒就地寸磔逆弟范六一併斬梟實足以快人心而彰國憲惟容岑一帶伏莽尙多藤縣蒼梧平南各路土匪亦未遽淨著張凱嵩卽飭蔣澤春督率全軍會同潯梧兩府乘首逆就殲賊勢瓦解之餘迅將各路餘匪搜捕淨盡毛鴻賓郭嵩燾卽飭方耀一軍會同西省官軍實力剿除以清積孽范逆就擒後該省著名

悍逆自以黃三爲最該逆踞伏天平寨地險巢堅復有分竄橫州之李亞得甘太然等股勾結永淳土匪分我兵力尤應合兩省官軍會克堅巢誅鋤巨憝著張凱嵩督飭劉坤一迅將黃三一股掃穴擒渠次第廓清橫州等處之賊李幅猷於連陽就擒全股肅清廣東兵力自己已餘並著毛鴻賓郭嵩燾崑壽派撥前軍與劉坤一合力痛剿速籌蔽事見在廣西右江軍務漸已就緒其左江一帶無有另股並著張凱嵩妥爲辦理肅清全粵以副委任另片奏馬平縣獍匪梁扶英歷年稔惡曾受僞封深居獍地柳慶之民受其荼毒經代辦提督蕭榮芳等督率兵練攻破各寨直擣其巢力戰合圍遂將該逆土博老巢攻毀生擒梁扶英正法餘匪擒斬殆盡等語剿辦尙爲出力仍著督飭地方文武搜捕逸匪撫綏難民將善後事宜妥爲籌辦出力員弁紳團准其擇尤彙案保奏毋許

冒濫廣西各屬似此等匪徒嘯聚之處恐尙不少並著該撫通飭所屬認真剿辦毋畱亂萌將此由五百里各諭令知之○壬戌諭議政王軍機大臣等慶昫等奏甯夏漢城內亂並迎催道員和祥路阻未能前進各摺片據稱十月二十三日四更後滿城中聞東路火發聲料是漢回又聞黎明派員查探途遇難民墜城逃命城門兩日未開其中是何情形無從得知並迎催和祥之委員行至納家牯地方因回匪攔路未能前進各等語覽奏實堪詫異前據慶昫等奏甯夏回日較前斂迹咸稱團練一散卽當遵檄器械聽憑官辦各謀生理並令本地紳耆曉以利害俾息殺機何以此次忽有爭鬪之事是否侯雲登剛愎釀亂抑係撤團後回眾滋事近日城中情形究竟如何慶昫等摺聲敘殊未明晰著熙麟恩麟確切查明據實具陳毋得稍涉含糊侯雲登及城內文武各員下落

一併查奏道員和祥著催令迅速赴任該員係前經獲咎之員是  
否可靠並著熙麟等詳加察看具奏靈州平羅各缺何以尙無人  
到任殊屬不成事體該督等務嚴飭委署各員速卽赴任如再玩  
延卽著從嚴參辦昨因雷正綰抵甘諭令熙麟於該提督抵平涼  
後卽馳赴蘭州整理一切防勦事宜近省一站卽已文報不通恩  
麟所司何事著卽派兵疏通驛路熙麟亦卽督率所部逐節掃蕩  
直達省垣以重職守正在寄諭閒據張集馨奏甘肅甯夏靈州相  
繼失守靈州與陝西定邊毗連賊若東竄不但擾及陝境延安等  
府滋蔓難圖並慶陽餉道亦恐梗阻且恐闖入晉省完善之區該  
署撫已飛調延綏鎮兵一千名派署遊擊慶連統帶赴定邊屯紮  
仍恐兵力單薄不敷堵禦著多隆阿雷正綰於涇州防兵內酌撥  
數營前赴定邊先行扼紮協力防勦並於正甯一帶派兵堵禦使

平固逆匪不至回竄三水湟化復擾秦疆仍一面力籌進剿迅殄逆氛無任延蔓張集馨當飭北山沿邊州縣趕緊集團堵禦以壯聲威山西邊境界連甘肅德勒克多爾濟當整頓綏遠城官兵豫備防堵無任匪蹤闖入邊界英桂尙未起身沈桂芬將次抵晉著卽檄飭沿河州縣實力防堵並飛調弁兵相機堵剿以固疆圉甯夏漢城旣失滿城獨力難支著熙麟恩麟迅卽派兵援救慶昫等務當固守待援勿再一意主撫致誤事機甯夏靈州失守詳細情形並近日甘省軍情著熙麟張集馨查明隨時具奏將此由六百里諭知多隆阿慶昫常陞德勒克多爾濟熙麟雷正綰英桂沈桂芬並傳諭恩麟張集馨知之○癸亥諭內閣曾國藩奏提督呈請開缺回籍養親據情代奏一摺福建水師提督楊岳斌因父母年逾七十母病見又增劇懇請開缺回籍養親具見孝思惟楊岳斌



督率水師剿賊十年戰功懋著此時金陵合圍正賴該提督等和衷努力共奏膚功未便於軍務喫緊之時遽易生手楊岳斌省親一事著俟克復金陵後再行請旨此時毋庸開缺回籍惟念楊岳斌軍旅羈身伊父母年邁多病未能歸省著加恩賞給人蔭四兩藉資調攝以示錫類推恩至意○諭議政王軍機大臣等曾國藩奏提督李世忠率師疊破苗圩會復懷遠縣城一摺另片奏金陵軍營布置情形並收復潁上正陽各城等語李世忠因苗逆倡亂自率所部先後削平四十餘圩並會同唐訓方收復懷遠縣城剿辦甚屬出力著准其開復革職畱任處分以昭激勸其餘出力員弁並著曾國藩擇尤奏請獎勵兩城業經蔣凝學毛有銘等次第收復附逆各圩亦各聞風反正惟苗天慶等率黨遁逃該大臣仍當飭令蔣凝學等嚴密搜捕務絕根株金陵之師開挖地道轟城

該逆竟能搶堵缺口未竟大功殊爲可惜見在曾國荃已督飭各軍進剿孝陵衛城絕賊糧運惟有穩紮營壘逐漸緊逼俾該逆酋無路可竄將來城下之日洪逆生擒東南數省一律肅清不至再煩兵力方爲妥善楊岳斌因母病增劇懇請開缺回籍省親具見孝思該大臣務當諄飭該提督暫抑私情勉成大功用副朝廷優加委任至意曾國藩另奏酌保賢員以備器使一摺所請將陳濬等以道員記名請旨簡放之處覈與吏部定章不符已另交軍機處存記候旨錄用將此由五百里諭令知之○曾國藩奏自苗逆倡亂連陷壽州潁上懷遠各州縣圍撲蒙城分伺臨淮李世忠由滁誓師討苗派朱元興李顯發等各帶數千人赴援臨淮仍親督大隊移紮五河以爲之繼九月二十三日我軍循淮河南岸而上道出劉府考城灰溝一帶旋據姚家灣練總姚紹珍率眾來助李

世忠卽令徧諭各圩許以自新於是淮南北之聞風反正者百餘圩十月初三至十二日李世忠督軍前進疊破中心渡小古墩集數十圩並將夏家寨攻破殲斃悍賊甚多壽東附苗十一圩不戰而潰二十二日李世忠旣派李顯爵帶礮艇出蚌埠擊賊獲勝尋聞蚌埠守賊張士端舉眾就撫計懷遠一城必可襲取遂於二十七日督同李顯發等舍壽州而轉趨懷遠與唐訓方會師城下未幾城賊自亂我軍乘勢急攻賊卽拔關出降各軍整隊而入立將縣城收復臣查逆練苗沛霖稱兵復叛疊陷城池屢以甘語詭詞煽誘李世忠乃李世忠赤心報國作嚴檄以誅苗申大義而誓眾親率萬數千人削平四十餘圩收復名城實能有裨大局除該提督部將李顯發李顯爵業由撫臣唐訓方請獎外應懇 天恩俯准開復李世忠革職畱任處分以昭激勸其餘出力員弁可否容

臣查明酌保之處出自 聖裁再蔣凝學成大吉等進取穎上於十一月初二三等日攻毀近城七圩該城頭目方長華乞降不許乃斬苗憬和苗憬花以獻次日遂復縣城毛有銘初四日進攻正陽關苗黨朱萬澄遣人乞降適僧格林沁遣將康錦文富明阿遣將程文炳前來招撫遂會同納降收復正陽關城 上諭前因僧格林沁吳棠奏稱李世忠盤踞利源殺害勇丁各情當經密諭僧格林沁曾國藩等會同密商妥辦本日據曾國藩奏李世忠率練會剿苗逆削平各圩有裨大局懇請開復該提督革職畱任處分並請保其餘出力員弁本日業於另寄曾國藩諭旨內允准曾國藩於李世忠在壽州下蔡等處跋扈情形發摺時似係尙未知悉朝廷亦就事論事姑允所請賞功罰罪本屬並行曾國藩亦可因此次加恩曉以大義儻該提督感激悔悟恪遵曾國藩札調前赴

軍營遣散部眾將所踞城池鹽利釐卡交出歸官如可調遣布置一切悉由僧格林沁曾國藩等妥籌善後如抗不遵調僧格林沁曾國藩等仍當懷遵本月十八日密寄諭旨密函會商妥辦毋稍姑容此旨並著該大臣等密函知照吳棠唐訓方可也將此由六百里各密諭知之○曾國藩奏曾國荃雨花臺一軍於十月初五六等日攻克清化解溪隆都湖墅三全鎮五隘破賊二十餘壘金陵城東百餘里內一律肅清遂於十五日進紮孝陵衛城賊運糧之路業已斷絕惟城內賊數尙多其氣尙固我軍於四月間開挖地道直至十一月初五夜始得挖成用火藥轟陷十餘丈該逆內築月城下穿橫洞竟能搶堵缺口我軍陣亡三百餘人傷者更多蘇州克復後聞僞忠王之計將入金陵挈洪逆以出竄臣觀洪酋之堅悍未必肯棄金陵而竄他處目下當以全力謀破堅城一面

布置各軍分堵上游事機愈順圖謀愈不可不慎報聞○甲子諭  
議政王軍機大臣等熙麟奏甯夏靈州相繼失守甯正綰兵已入  
甘境接仗獲勝並請飭陝西供支糧餉各摺片甯夏府城內回民  
與城外賊匪勾結內外交訐於十月二十四日失陷靈州城亦於  
次日相繼失守該回逆等奸亂性成非痛加勦洗不足以淨根株  
此股賊首係陝西投賊之武進士王錫爵經官軍擊敗竄匿靈州  
之金積堡勾串疊次僞爲投誠之馬化澂率其黨與兩日之內頓  
陷州郡兩城實堪痛恨前據恩麟奏馬化澂在署臬司楊柄銓行  
營投誠此次又復鼓眾煽亂連陷二城可見恩麟前此辦理草率  
難保非遷就完事粉飾入奏著熙麟速飭毗連甯靈各州縣文武  
督率兵勇鼓勵鄉團嚴扼要隘以防該匪紛竄並飭派出之延綏  
鎮兵五百名迅赴花馬池駐紮嚴扼該匪竄陝之路張集馨前已

調延綏鎮兵一千名前赴定邊著卽飭令統帶之遊擊慶連與花馬池防兵互相聯絡以州聲援並著多隆阿雷正綰遵奉前旨於涇州防兵內酌撥數營馳赴定邊協力防剿毋稍大意此時甘省逆氛徧地雷正綰軍營兵力尙單所有陶茂林曹克忠兩軍卽著多隆阿迅催前進馳往甘省助剿毋許稍事逗遛平涼賊匪攻撲涇州經雷正綰督兵擊退並解靈臺縣城圍正可乘此聲威進克平涼以次收復固原其甯靈鹽茶廳等處逆匪怙惡不悛均須次第剿洗不可輕率議撫致貽後患甯夏一帶驛站多有夫馬俱無之處積壓公文摺報甚多且有批摺寄諭多件經熙麟專差弁兵逐站清查分別齎送蘭州慶陽自十月十七日以後兩旬有餘又未接省城文信若謂道途梗塞文報難通何以熙麟遣往弁兵又可行抵省城可見恩麟一味顛預並未辦理公事著熙麟卽行嚴

飭恩麟設法疏通文報以通省垣信息投賊之武進士王錫爵是  
否回人並著熙麟查奏將此由六百里諭知多隆阿熙麟雷正綰  
並傳諭張集馨知之○乙丑僧格林沁奏豫省歸德一帶設有勇  
丁數千經費亦屬不貲此項勇丁當捻氛正熾之時防剿原不足  
恃不過藉有備之名以安民心而人數既眾於民間不無擾累茲  
捻匪均已掃除歸德一帶無須設防相應請旨飭下侍郎毛昶熙  
將所募之勇遣散歸農以節糜費至各省設團練修團寨原以助  
守望而禦寇盜節經費而輔兵力權宜補救法非不善乃各團每  
以有寨可據輒藐視官長擅理詞訟或聚眾抗糧或挾仇械鬪甚  
至謀爲不軌踞城戕官如山東之劉德培河南之李瞻安徽之苗  
沛霖等先後倡亂勞師糜餉始得次第剪除查辦團之舉始則合  
一鄉爲一團繼而聯眾團爲一練地廣人多良莠不齊一有不肖



團長稍露跋扈情形承辦團練紳士又不能杜漸防微隨時舉發致有尾大不掉之勢況捻匪屢經竄擾之區亦未見各團堵禦得力其河南團練均歸侍郎毛昶熙管理該侍郎於通省地方安能周歷兼顧而各練既有專管大員地方官因而呼應不靈幾同虛設見在賊氛漸就削平應請飭令毛昶熙回京供職所有團練一節卽照直隸山東統歸地方官經理以一事權並請飭下河南巡撫督率地方官妥爲辦理務當實力嚴查各團如有添置軍器等事均責令稟請地方官批准方許置備儻不肖團長借修團製械種種斂錢以致苦累鄉愚一經查出隨時從重懲辦庶幾權歸於上免滋流弊 上諭內閣各省設立團練原以助守望而禦寇盜輔兵力之不足其能協奏官兵保衛桑梓者固不乏人乃或有不肖團長以有寨可踞藐視官長甚至擅理詞訟聚眾抗糧挾仇械

鬪其尤甚者竟至謀爲不軌踞城戕官卽如山東之劉德培河南之李瞻安徽之苗沛霖等先後倡亂皆由團練而起雖螳臂當車終歸剪滅而國家已重煩兵力良由辦團之人良莠不齊閒有一二團長倚勢跋扈承辦團練紳士不能卽時舉發遂有尾大不掉之勢國家使民自衛以衛地方似此奉行不善流弊滋多殊非杜漸防微之意見在賊氛漸就削平除直隸山東兩省統歸官爲經理所有河南省團練事宜著卽照直隸山東兩省統歸官爲經理以一事權如果地方官吏認真從事與百姓聯爲一氣則民方恃以保衛閭閻斷不至有抗拒情事著張之萬督飭各守令實心實力辦理不可有名無實至各直省舉行團練均須慎選賢能之員悉心妥辦務使收守望相助之效而無藐法抗官之弊以資捍衛而立防閑方爲妥善將此通諭知之○僧格林沁奏恭奉諭旨蒙

城被圍實由唐訓方不能豫先籌顧令臣查明具奏查原奏內稱苗沛霖今春糾黨圍蒙練董李南華及署知縣賀緒藩督飭勇練堅定苦守又有臬司馬新貽一軍駐紮聯絡尙可支持迨進攻懷遠之軍失利臨淮喫緊唐訓方札調馬新貽辦理營務並抽調王才秀兵勇赴臨助剿又飭英翰撤回小澗集致與城內聲氣不能相聯任賊合圍補救爲難等語當飭馬新貽英翰將撤調各情據實稟報茲據馬新貽申稱七月十九日奉唐訓方札飭以苗逆親率大股死黨並撤蒙城圍賊全力下竄圍我前敵各營糧道梗塞萬分危迫飭該司卽帶王才秀一軍赴臨其時蒙邑城外尙有賊壘十餘座情形稍鬆隨將各營勇練均交英翰接統又據英翰稟稱馬新貽統兵時久經駐紮小澗集兼顧後路七月二十四日英翰奉委統軍時係由袁家集馳至小澗集接統蒙軍卽紮該處並

非奉調退紮小澗各等語臣查唐訓方因逆匪下竄圍撲前敵各營糧道梗塞彼時蒙城賊勢稍鬆札調馬新貽一軍馳赴臨淮固屬移緩就急之計而苗逆知臨淮猝難動搖復以全力突圍蒙城是蒙城賊勢又復趨重唐訓方彼時自應趕緊將馬新貽之軍調回援剿抑或親統重兵赴援方爲正辦乃僅遣宋慶帶領千餘人前往該撫並不親督兵勇實力解救以致蒙城岌岌幾致淪陷其緩急調度失宜實所難辭再懷遠逆首張士端因聞臣等督軍進解蒙圍恐將及己是以趕緊投誠乃唐訓方奏報收復懷遠鋪張其詞且遽將張士端保以開復勇號花翎又請以遊擊儘先補用幸聖明鑒燭僅將張士端賞給遊擊銜以觀後效惟張士端既經保獎所有獻出壽州之李萬春獻出潁上之方長華事同一律若不做照請獎又覺辦理兩歧伏乞訓示遵行上諭僧格林沁

奏遵查從前蒙城復行被圍情形一摺前此苗逆撤退蒙圍全股下竄之時安徽巡撫唐訓方以臨淮緊急將藩司馬新貽所部由蒙城調回致蒙城守禦單薄墮賊奸計復行被圍該撫僅派宋慶統帶千人前往未將馬新貽調回蒙城復未能親督兵勇迅速赴援以致日久重煩兵力實屬措置乖方其據報收復懷遠情形亦屬未能明晰唐訓方著交部議處○諭議政王軍機大臣等王明等奏官兵剿辦盜匪獲勝情形景綸等奏擊獲首夥各匪正法各摺據王明等所稱滾地雷王五竄至吉林屬界半拉山門經協領穆錦馳擊獲勝追至圍內砬子溝先後斃匪多名及賊目孫四海等數名所有竄入圍場之賊擊斃殆盡另股賊匪聞風星散景綸所奏逆匪經奉省官兵擊敗由蕭赫站雙岔子溝竄入圍場其齊秀發等十八名經兵勇先後擒獲正法各等語此股逆匪以王五

爲盜首見在該逆分股漏刃脫逃亟應乘其亡魂喪膽之餘合兩省官軍殲擒首逆埽清餘孽豈容任其免脫景綸等於賊擾昌圖廳時報稱派兵防堵迨賊竄入吉林所屬之長春廳靠山屯及占踞半拉山門等處該將軍並無一字奏報卽此次摺內所稱拏獲賊匪齊秀發等未聲明兵勇如何接仗賊由何路竄走而於奉天兵勇將圍場之賊擊斃殆盡亦罔聞之該將軍於所轄境內軍情賊勢偵探尙未明悉奏報亦復寥寥誠不知所司何事實屬顛預著玉明景綸迅卽督飭兩省官軍探明賊蹤實力會合勦辦務將逆首王五等按名弋獲盡殲醜類不准一名漏網並不得以此次一經參奏卽爲了事儻該將軍等任令匪蹤四竄或縱首逆脫逃必惟玉明景綸等是問才寶善白凌阿雖據賊供並未在此股賊內殊難憑信仍飭帶兵員弁查明實在下落與王五等一併購緝

拏獲母任竄逸將此由五百里各諭令知之○僧格林沁國瑞奏  
臣國瑞於十一月初四日帶領馬步趕到石弓山正值翼長蘇克  
金等督隊進攻項盤圍寨當將南圩攻破殺斃賊匪無數餘皆遁  
入北圩臣國瑞督軍進攻馬步分作兩層嚴密圍困該逆見圍偏  
緊急卽於是夜潰散遂將擒首項盤其弟項學里並賊黨李貝兒  
等十餘名悉數擒獲正法餘匪分別殲戮解散連日督飭翼長舒  
通額蘇克金分路收復被偏圩寨一百餘處永宿一帶已無賊蹤  
十三日臣國瑞帶隊回營至前派副都統恆齡清查渦河以南圩  
寨旬日之間於蒙亳阜陽境內清理八十餘圩並擒斬擒首葛小  
牛兒仍赴潁州等處次第清理又侍郎毛昶熙派員解到投誠之  
程三老砍卽程大寬與程大老砍之子程友政訊據該犯等均稱  
程二老砍情甘投誠當經傳諭趕緊來營程二老砍旋赴恆齡行

營乞降經該副都統派員解送到營查該犯等尙屬誠心歸正應准效力贖罪其著名擒首鄒喚林龔耀及從犯多名均經擒獲正法又據總兵陳國瑞稟稱初六日總兵宋慶將正陽收復其李世忠爭奪下蔡壽州之事據稱該提督之隊見已撤回兩面釋然無事惟正陽收復後又有道員蔣凝學等爭奪開礮擊傷兵勇復經臣僧格林沁移咨督臣曾國藩認真查辦又據道員蔣凝學稟稱十一月初三日已將潁上縣城收復等情查苗逆所踞各處已經各路官軍先後收復會擒匪首經我軍殲除殆盡皖境漸就肅清仍須駐兵清理各處圩寨搜拏餘孽免貽後患惟豫西尙有大股捻逆張總愚竄踞浙川又有川匪藍二瞬東犯西坪自應撥兵往剿就地殲除臣等見派翼長蘇克金帶領馬隊千餘名卽日啟程由陳州馳往許州會合豫省官軍併力剿辦查程二老砍李大箇



子魏羣兒均願效力贖罪臣等卽令其各帶百餘人隨同官軍前往效力以便解散黨與使該逆勢孤進剿可期得手惟該逆所踞之處近於山谷馬隊官軍利於平原追剿儻該逆一經受創鋌險入山則馬隊斷難跟追止可近紮山口臣等咨行撫臣張之萬豫先責成總兵張曜等帶領步軍準備入山搜剿如能擊賊出山則馬隊卽可跟蹤剿辦庶幾各有專責以免推諉復思捻苗各匪均已削平豫省官軍無須設防卽可全力進剿張總愚股匪業經咨商撫臣酌覈如果汝甯一帶見無賊蹤卽調各處防兵雲集浙川四面合圍使該逆無路可遁聚而殲旃上諭僧格林沁奏擒獲捻首項盤等犯收復潁上正陽等處皖境漸清見撥馬隊赴豫進剿張總愚股匪等各摺片籌辦均爲妥協覽奏欣慰苗逆所踞各處均經官軍先後收撫會擒匪首殲除殆盡皖境漸就肅清其尙

有各圩寨及零星餘匪應行搜捕淨盡以絕根株之處仍著妥爲辦理免畱餘孽其程二砍及李大箇子魏羣兒赴營乞降均准效力贖罪仍應隨時查察是否真心悔罪分別辦理苗憬開係苗逆死黨屢經竄擾豫省著名兇惡之犯尤須加意察看妥籌辦理毋貽後患皖北善後事宜當此地方新復腥穢甫蠲瘡痍滿目之際一切撫綏教養尤關緊要全在地方官吏慎選賢能牧令妥爲經理卽著曾國藩與唐訓方嚴督所屬詳切講求實力辦理懷遠投誠之張士端業經給予遊擊虛銜礙難收回所有獻出壽州之李萬春獻出潁上之方長華與張士端事同一律其應如何酌加獎勵之處仍著僧格林沁擬定具奏正陽收復之時道員蔣凝學何以有爭奪開礮致傷兵勇之事竟與李世忠前事相同此次蔣凝學係與何人爭奪因何致有爭端著僧格林沁曾國藩查明據實

奏聞不准稍涉徇庇迴護豫省見惟張總愚股匪鴟張爲患見有張曜督軍勦辦僧格林沁復經派撥蘇克金等馬隊前往勦辦正與本日寄諭該親王之旨適相符合具見老成謀國思慮周詳深堪嘉許該親王於皖境肅清後卽當移軍豫省中州平定可期毛昶熙所部勇丁原屬權宜辦理以助兵力之不及此時兵力足敷應用著毛昶熙卽行散遣均令歸農以節糜費而免滋事該侍郎卽回京供職將該省團練事宜仍歸張之萬督率地方官吏妥爲辦理張之萬身任封圻於軍務團練等事均屬責無旁貸尤應及時整飭以副委任團練用民自衛修堡築寨以資守望而禦寇賊詎非良法乃或奉行不善往往輒滋弊端甚有敢行倡亂如苗沛霖劉德培李瞻等致煩兵力本日復經明發申諭各該督撫諒能善體此意得人而理期於有備無患是爲至要將此由六百里各

諭令知之○諭前據慶昫等奏甯夏漢城內亂張集馨熙麟奏報甯夏靈州相繼失陷甘肅回氛甚熾亟宜增兵調將以固秦晉邊防見在多隆阿在藍屋爲一隅所牽掣漢南賊勢猖獗劉蓉尙無入陝消息而張總愚一股盤踞浙川山內藍逆由山陽出竄仍在商南之青山口距荆子關僅八十餘里陝豫軍務方殷而甘肅平固未復甯夏靈州又陷該回逆東犯秦晉北竄蒙古皆可長驅直入陝省西北定邊一帶計惟多隆阿所部之兵就近可以調往扼紮而多隆阿旣須撥甘又須防陝非由各處撥兵赴陝多隆阿亦難分兵兼顧刻下最要者惟浙川之張總愚一股該匪負隅死拒一日不了則河南湖北陝西三省皆不得安枕楚豫兵力亦難勻撥赴陝著張之萬督同張曜及派出各兵認真進剿如兵力尙單卽飛咨僧格林沁等調撥馬隊助剿楚省鄖陽防兵見因商雒浙

川一帶賊蹤未淨固不可以移動而麻黃襄棗一帶防兵與其設防於內境不如兜剿於鄰封官文向能不分畛域嚴樹森亦豈得偏持成見存此疆彼界之心致成不了之局貽患生靈著卽嚴飭在防各軍赴豫會剿張之萬久駐許昌殊無裨益著懷遵前旨移營進紮淅川一帶就近督剿兼遏賊匪紛竄之路所有張總愚一股卽著責成楚豫二省協力剿除儻任蔓延竄越或時日久稽卽惟官文嚴樹森張之萬是問苗逆授首以後餘黨以次伏誅壽潁各城均已收復見止剿辦零星股匪可以無須大兵屯聚淅川張總愚一股經楚豫兩省兵力夾剿亦可迅速完竣是皖省張得勝蔣凝學成大吉諸軍及楚豫兩省得力勁軍均可移緩就急分撥赴陝進紮商雒荆關等處要隘歸多隆阿劉蓉調遣以便多隆阿添兵助剿平固漢南及扼防陝省西北邊界陝甘兩省軍務方有

起色此中布置機宜必須先事籌畫臨時始有成算在胸著僧格林沁官文曾國藩多隆阿等會商妥籌調度以期一勞永逸屆時何營可以畱防以資扼守何營可以赴陝歸多隆阿調遣之處並著迅速會商妥協一面調撥一面奏聞見在皖北及豫省零匪卽可由僧格林沁張之萬唐訓方督同陳國瑞張曜等軍實力剪除楚豫交界捻股卽由曾國藩責令皖北楚軍會同豫軍分投辦理吳棠嚴飭姚廣武等肅清徐宿一帶捻圩均須剋日掃蕩一律肅清不得稍有遷就以致重煩兵力皖北肅清以後陳國瑞一軍應否移紮徐宿以資彈壓之處著僧格林沁吳棠等屆時酌量具奏至僧格林沁大軍一俟皖省肅清卽可移紮豫境就近督飭將弁相機勦辦如楚豫將弁各懷觀望不肯奮勇勦洗卽著從嚴參辦毋稍姑容李雲麟當懷遵節次嚴諭回軍商南勦除蔡逆餘匪不

准遷延劉蓉速紮青石關與多隆阿聯絡聲勢力圖克復漢南各城毋得再有濡遲目下東南事勢大有轉機而西北逆氛尙熾該大臣督撫等各有地方帶兵之責務宜通籌全局及早圖維乘此聲威削平醜類如有所見不防據實奏聞以收集思廣益之效將此由六百里各諭令知之○諭多隆阿奏病勢增劇請假調理一摺披覽殊深廕繫著卽賞假一月俾得離營安心調理整厓合圍業已月餘攻擣正當喫緊諸將士必須有所稟承方不至事機有誤並著照所擬卽責令西安副都統穆圖善暫行接辦務令一切遵守布置妥爲辦理遇有緊要機宜該將軍仍當隨時指示俾有遵循多隆阿仍卽趕緊調理速就痊可赴營任事以慰懸厪本日又據李雲麟奏稱鎮安山陽洵陽等縣交界回匪滋擾經該京堂督兵擒獲首匪餘眾繳械乞降分別安撫擇其壯佼數百人立爲

隴軍歸化一營隨同勦賊等情著准其將此次出力員弁附案擇  
尤酌量保奏新立之歸化一營仍應隨時防範毋稍疏虞另片所  
稱見在擬由西鄉進勦劉蓉欲改由甯羌進兵請飭仍照前議進  
由青石關以便居中調度等語卽著劉蓉查照該京堂咨會情形  
妥籌進止惟李雲麟前將藍二順股匪委之藍斯明一軍捲旆而  
西此時藍逆竄回商南賊勢正張斷非藍斯明一軍所得獨辦節  
經寄諭該京堂回軍會勦以贖前愆李雲麟如執意西行以勦辦  
興漢爲詞是直處心趨避且獨不思商於一路藍逆如再鳴張於  
該京堂一軍後路大有妨礙仍著懍遵前旨迅速回勦與藍斯明  
併力圖功將商南之匪悉數殲除方可專意再圖興漢劉蓉於陝  
南勦賊事宜籌定後究由何路進兵速卽奏聞將此由六百里諭  
知多隆阿劉蓉李雲麟並傳諭張集馨知之○諭英桂奏川捻各



匪竄踞秦豫交界並聞甘省甯夏靈州繼陷分飭所屬加意探防  
一摺前因藍張兩股匪徒各竄秦豫交界之商南浙川地方及甘  
回疊陷甯夏靈州疊經寄諭晉省實力籌防並相機堵剿茲據英  
桂奏稱晉省沿河口岸林立地廣兵單見飭副將羅承勳帶楚勇  
五百名扼紫蒲解一帶爲遊擊之師何路緊急卽赴何路策應以  
防藍張二逆並以甘回攻陷甯夏靈州口外各廳多屬毗連雖有  
滿蒙官兵千餘名及大同鎮兵練沿河設備仍恐不足扼守已令  
總兵慶德就近嚴防將遼州潞安防兵飭令歸伍以備調遣著卽  
照所擬飭令慶德羅承勳嚴密防剿藍張二逆其勢駸駸屢欲合  
併僅有豫省張曜之軍擋拄其閒陝省商潼一路僅藍斯明一軍  
甚屬單薄且恐秦豫兩軍併力勦辦得手賊勢乘閒奔突晉省沿  
河毗境更宜嚴防英桂尙未離晉沈桂芬何日可以抵任務卽飭

令沿河地方並羅承勳等嚴密戒備不得稍涉疏虞甘回逆燄突張甯夏靈州猝被攻陷此與他賊不同其種類到處皆有不可不豫爲之防晉邊口外各廳多連甘境卽綏遠歸化二城及張家口皆可由蒙古草地直達甘省而蒙古未必能設偵探尤恐甘回狡詐潛行假道或遣奸回四出誘煽著英桂沈桂芬速飭口外各廳密行梭巡防患未然德勒克多爾濟阿克敦布等亦卽廣設偵探於綏遠歸化二城張家口各處循環邏察並須遠探蒙古境地彼此聯絡聲息相通以爲備豫綏遠城察哈爾官兵並著該將軍都統等勤加訓練以備不虞勿稍懈弛將此由六百里各諭令知之○諭丁曰健奏出師放洋由省對渡淡水滬口見擬添勇籌剿一摺臺灣匪徒滋事日久亟應速爲剿除徐宗幹見挑省兵四百名派參將田如松統帶赴臺丁曰健亦自省徑渡淡水之滬尾口登

岸馳至猛艍左宗棠徐宗幹卽飭吳鴻源曾元福曾玉明各軍分  
路並進丁曰健卽由淡水大甲而南會齊諸軍進克彰化斗六以  
期漸次肅清該道見因兵力尙單擬令軍功范義庭等招募勇丁  
前赴竹塹城聽候調用著卽慎加挑選毋令奸細溷迹致與賊匪  
句合丁曰健擬令彰嘉各營及湯得陞所帶兵勇由西螺虎尾溪  
一帶進發聯絡彰化令凌定國所率義民剋期會剿參將關鎮國  
率駕紅單礮船赴梧棲港口會同同知王楨勇丁合攻設投莊等  
處疏通鹿港後路並派兵與通判張世英之師直擣賊巢該道卽  
由牛馬頭直勦竹坑收復大肚溪先克彰城次取斗六所籌尙合  
機宜卽著照所擬辦理前據徐宗幹奏稱林文察已抵蚶江口配  
船候渡見在已否抵臺著左宗棠徐宗幹迅飭該署提督速行渡  
臺督兵會剿毋稍遲緩正在寄諭聞據丁曰健續奏直抵彰化逆

巢連獲大捷並請將出力官紳兵勇等擇保各摺片此次丁曰健由淡水進至大甲將匪首劉阿妹掩捕正法派勇馳往內山分剿犁期店一帶賊巢牽掣內山逆匪不令出援葭投而親至梧棲港派撥勇練分路進攻彰化境內賊巢連日陸續攻破田中央海玻璃水裏港福州厝各賊莊並將蘆仔底等十餘莊及無名小莊十餘所同時平毀復將葭投尾莊外賊營三座及八張犁何厝莊賊營七座焚毀斷賊糧道其凌定國一軍亦先後攻破竹仔腳等大賊莊二十餘處並將海峰崙陳啞狗老巢焚毀生擒逆首林振等十三名被脅各莊望風歸順見在鹿港至北斗大路業已疏通辦理甚爲得手丁曰健熟悉臺灣情形且素能與該處紳勇聯絡此次抵臺後調集鄉團分路剿賊所向有功該義勇等隨同出力亦屬可嘉著丁曰健卽激勵各義勇等乘勢攻拔葭投以次進取

彰化並飭凌定國等迅拔斗六殲擒戴逆一面催督曾元福等會合夾擊勿任延宕所有此次水陸兩軍出力之員弁兵勇紳民人等著丁曰健暫行存記俟彰化斗六攻克後彙案奏請獎勵將此由五百里諭知左宗棠徐宗幹並傳諭丁曰健知之○丙寅李鴻章奏臣派撥水陸各軍分路兜剿浙西之賊疊據劉秉璋呈稱嘉城東六里張涇匯爲婁嘉平三邑要路該逆堅壘重濠聯絡固守劉秉璋先於十月二十日由楓涇帶隊進攻該處官塘南北岸有石壘四座逆眾出拒我軍拔樁下濠分撲各壘劉秉璋在濠邊揮戰援賊大至我軍憑河分堵猛撲數十次賊在營後站隊壘賊抵死拒敵劉秉璋骹受槍傷仍督隊撤回嘉善踞賊遂連日糾眾出竄劉秉璋派令駱東昌帶船分扼茜涇及伍子塘與曾守忠師船聯絡二十一日城賊大股直撲千窯之鳳洞橋大通橋一帶離伍

子塘不遠駱東昌等師船並進連毀亭子橋口及鳳洞橋木卡二座斃賊不少賊卽敗走退至大通橋外二十八日城賊又出大股馬步萬餘人槍礮船百餘號由南星橋分股撲東茜涇口師船分投迎擊賊猶恃眾不退劉秉璋以茜涇爲西塘風涇中間要路二十九日抽撥水陸隊伍往剿該逆屯踞大河南北中搭浮橋於南岸橋口築卡我軍先擊退北岸之賊又進擊南岸之賊該逆退入村莊小有斬獲三十日水陸各軍復分路夾擊列隊茜涇四汊河口擊斃南岸賊二百餘人賊勢不支由浮橋南退適太湖水師及潘鼎新楊鼎勳各營亦皆派隊來援賊眾狂奔橋斷溺斃無數我軍乘勝追擊賊仍逃入城中其北岸與未及過河者二百五十餘人悉數擒獲十一月初四日劉秉璋創傷漸愈又率水陸各營往攻張涇匯潘鼎新亦派徐道奎帶三板船十七號趙濟川帶礮隊

兩哨助剿劉秉璋令蔡涓川等帶船攻河南石壘以綴賊勢令趙濟川以炸礮打河北橋頭賊壘斃賊甚夥賊仍抵死不退聶桂榮等帶二營一齊猛撲拋擲火罐延燒賊屋賊始慌亂我軍肉薄以登殺賊百餘當將北岸橋頭賊壘攻克其餘壘賊各駭而奔適善城援賊大至我軍分路包鈔斬馘數百人賊棄械狂奔所有張涇匯賊壘一律攻奪劉秉璋當派袁發萬重宣填紮二營爲進逼嘉善地步臣仍飭劉秉璋等相機攻剿程學啟李朝斌水陸各軍亦已次第分道前進冀成犄角之勢又奏臣於十一月初五日馳往無錫晤商李鶴章劉銘傳等偵知常州護逆一股因蘇錫克復其部眾漸已離心正當乘機進取遂飭劉銘傳督帶所部九營並駱國忠二營張桂芳一營由江陰西南焦塾三河口等處進紮李鶴章派周盛波張樹聲等十二營由運河官塘進紮圖攻常州步步

爲營穩慎籌辦臣訊據無錫逆首僞潮王黃子澄供稱忠逆見帶各股賊眾退聚丹陽欲突圍入金陵將洪秀全之子擁戴出城竄擾江西仍畱僞天王守金陵以待援應等情未知確否業將該逆首黃子澄暨其子黃德懋凌遲處死懸首示眾又准曾國荃來函金陵官軍業經合圍城中接濟已斷驚擾異常惟洪逆踞陣死守似忠逆未必能遂入城卽進城未必能再出竄各路防備自須加嚴臣於初九日由無錫回蘇督籌善後各事查城內降眾難民尙有十數萬人近甚安靜其籍隸廣東湖南北江西者酌給川貲先行押送過江遞送回籍其隸皖浙江蘇者分別資遣安置派令署臬司郭柏蔭督同府縣官紳次第經理仍派六營分門駐守以昭嚴密上諭議政王軍機大臣等張涇匯爲嘉善東隅要隘見經官軍攻克賊膽已寒著卽督飭劉秉璋等進逼縣城並飭程學啟



李朝斌水陸並進迅掃賊氛以孤浙西賊勢左宗棠前已進攻餘杭見在嘉善之師正當得手著該督分撥所部將士會合兜剿速克堅城劉銘傳等軍由焦墊三河口進紮與李鶴章會攻常州步步爲營辦理甚爲周妥卽著李鴻章嚴飭劉銘傳李鶴章等穩慎籌辦毋稍大意馮子材接據曾國荃函稱忠逆已於本月十一日帶馬隊數百潛入金陵步賊仍紮句容等處見在金陵業經合圍著曾國藩飭令曾國荃等督飭各軍嚴加備禦密速圍攻斷不可令忠逆乘隙他竄李鴻章奏據逆首黃子澄供稱忠逆欲突入金陵將洪秀全之子擁戴出城竄擾江西雖未必盡屬可信然不可不加意嚴防著沈葆楨督飭江西各軍豫爲防範扼守要隘毋令竄入江境致滋蔓延蘇城降眾難民尙有十數萬之多著李鴻章飭令郭柏蔭等妥爲安插毋令滋事馮子材另片奏陴城劉巷守

卡賊目張九元棄卡來歸等語前據都興阿奏逆首張九元投誠  
爲賊所覺悉力圍攻張九元力不能支帶隊隨同官軍衝出與馮  
子材等所奏不符當經諭令都興阿等查明具奏仍著馮子材等  
據實奏聞將此由六百里各諭令知之○廣安徽盱眙縣學額一  
名○予江蘇陣亡副將王玉林祭葬世職○丁卯 上詣 大高  
殿祈雪○諭議政王軍機大臣等慶昫等奏甯夏漢城已成叛亂  
滿城情形危急雷正綰奏見在甯靈相繼失守請飭山陝兩省速  
派勁兵截剿各一摺前據慶昫奏甯夏回眾近尙安靜惟須撤去  
團練該回民始繳器械並將辦理不善之道員侯雲登撤任應足  
服該回眾之心何以復糾眾入城竟將侯雲登殺害是該回匪居  
心狡猾陽言就撫陰謀倡亂顯而易見慶昫等尙欲以理義與之  
剖論何毫無主見以至於此該逆膽敢圍撲滿城登梯而入傷我

牛彖佐領等官覽奏實深憤恨慶昫等不能先事豫防爲該回匪所愚弄實難辭咎但事已至此惟有亟圖補救勉贖前愆著慶昫等激勵滿城弁兵嚴密守禦所有填寫翎頂功牌分別賞給之處卽著照所擬辦理滿城旗戶餉需不繼每月餓斃者至二百餘名之多殊堪憫惻前次部撥甘餉疊經催令各該督撫迅解諒已撥解在途著英桂等添派兵弁由草地星速護解如緩不濟急熙麟恩麟均有地方之責豈可坐視不顧著該督等設法接濟毋誤要需平固未復甯靈又失熙麟等所司何事亟應竭力籌辦剋日救援毋得坐失事機致干重咎雷正綰見派馬天祥等扼紮環縣以固慶陽著俟涇城稍鬆卽督率各營相機進取陶茂林汧隴之師勦撫兼施計日卽可竣事著多隆阿飭令該提督馳赴甘境會同雷正綰合力勦辦甯夏境地與山陝毗連亟宜加意防範晉省見

有楚勇千名著英桂沈桂芬儘數調赴定邊協同張集馨派出防  
兵扼紮防勦惟晉省河防亦關緊要著閻敬銘迅卽選派得力兵  
勇千名星馳赴晉交英桂沈桂芬調遣以補其缺所調山西楚勇  
著英桂沈桂芬迅飭先行啟程不得專待山東各勇到後始行前  
進並著劉長佑挑派勁旅二千名交訥欽統帶星速馳由朔平綏  
遠歸化一帶進趨甯夏以勦爲防德勒克多爾濟等所部兵丁節  
經諭令該將軍等認真操演該兵弁技藝自必可觀卽著德勒克  
多爾濟塔清阿等懍遵前旨整頓士馬嚴密布置爲訥欽一軍後  
路策應如敢有名無實致該匪乘虛闖入或策應不力惟該將軍  
等是問曹克忠埽蕩麟遊回匪曾否肅清定邊所紮秦晉各軍不  
可無大員統領曹克忠帶兵素稱得力且相距尙屬不遠其能否  
酌帶所部調赴定邊將山西楚勇一千並歸統帶進攻甯夏之處

著多隆阿迅速斟酌調派如曹克忠一時未能調往應否改派何員前往並著多隆阿迅籌辦理刻下甯夏滿城萬分危急所調援軍由定邊朔平綏遠歸化分道並進不可株守一隅務當以勦爲防與多隆阿派出援甘各軍前後夾擊方爲妥善以上所調直隸山西各軍及曹克忠所部餉需均著由直隸山西兩省源源運解接濟阿拉善等旗地界毗連甯靈難保回逆不出邊滋擾著德勒克多爾濟迅速知照嚴密防範雷正綰另片奏行營軍火無多請飭陝省撥解等語所有雷正綰軍營應用鉛丸火藥仍著張集馨照舊接濟毋令缺乏將此由六百里加緊諭知多隆阿慶昫德勒克多爾濟英桂劉長佑熙麟雷正綰閻敬銘沈桂芬常陞塔清阿並傳諭恩麟張集馨知之○祁寯藻請表揚循吏命將已故同知劉大紳等政績宣付史館立傳召直隸知縣張光藻等來京○戊

辰諭內閣前因李鴻章奏請飭部揀發州縣二十員前赴江蘇差委業經批示准行因思內外臣工所保各員內有貴州舉人鄭珍莫友芝前奉天知縣安徽進士張保衡浙江附生朱粲前廣西候補知縣陳勛前浙江桐廬縣教諭王引孫湖南候選訓導向師棟候選知縣鄧瑤候選同知朱宗程江西廣豐縣進士鄭維駒金谿縣舉人徐仗祖廬陵縣廩生王其淦江蘇候補縣丞趙烈文卽用知縣常甯縣教諭成果道十四員均著發往江蘇以知縣用並著吏部查明各該員原籍地方行令該督撫飭令迅卽前赴江蘇差委仍著該部照該撫所請於科甲出身州縣內揀發十員前往○諭正白旗滿洲奏世爵病故無嗣應否仍准承襲開具家譜請旨一摺據稱該旗所管三等子爵鄂素病故無嗣該旗咨查吏部當據覆稱應以那彥成長子容安之子孫承襲惟容安前係獲咎之

員鄂素所出子爵應否停襲抑或照吏部覆文將容安子孫帶領引見等語鄂素之曾祖那彥成前於嘉慶年間因親督兵勇攻復滑縣城池勛勞懋著奉 旨賞給三等子爵准予世襲見在鄂素病故襲次未完所有此項三等子爵著仍准其承襲卽由該旗將容安之子孫揀選帶領引見○諭御史呂序程奏請飭查逆產及荒廢地畝安置難民降眾一摺軍興以來各直省被賊地方小民顛沛流離轉徙失業疊據江蘇安徽各督撫奏到新復州縣哀鴻遍野滿目瘡痍小民以兵燹餘生復困於饑寒而莫之或恤爲民司牧良用惻然見在蘇州省城克復高淳溧水無錫金匱疊下堅城皖北苗逆伏誅下蔡壽州潁上各城次第收撫皖南旌德太平建平甯國亦均陸續肅清方將與吾民同登衽席惟地方新復旣多難民益眾顛連無告倍可哀矜卽各營遣散降眾均皆朝廷赤

予自拔來歸亦宜早爲之所以免散亡因思各省州縣被賊盤踞多年其土著之賊及勾結入夥者所有逆產自宜查明入官至附近賊匪村莊淪爲賊產者亦應勘明給還原主以恤流氓著各該督撫於新復各處督飭各該州縣確切查明實在逆產入官其荒廢地畝有原業主者卽行給領尚未查得業主者卽著暫行造冊登記將此兩項地畝仿照山東招墾章程分別酌給難民降眾量爲耕種以資衣食俟業主續歸再行給還所有一切事宜並著各該督撫妥議章程慎選廉明守令妥爲經理不准假手吏胥致滋紛擾抑勒諸弊至凡屬軍務省分如有收復城池圩寨者均著隨時一律辦理以副朝廷矜念窮黎至意○諭愛仁奏訊明勝保案內汪耀奎竇型二員被參各款定擬一摺此案汪耀奎雖訊無攬捐舞弊及買送勝保民女等情惟於勝保家人買取民女係由該



員之姪說合謂爲毫不知情殊難憑信又於淮甯縣辦理勸捐噴有煩言且在勝保軍營疊次辦捐兼管營務種種夤緣包攬已可概見實屬卑鄙不堪竇型雖無索取馬承恩銀兩情事惟於施鵬兩次赴營交米均由該員經手又收受食物其交結包庇情弊顯然且據愛仁訪聞該員嗜好太多聲名狼藉實屬不堪造就愛仁僅請將該二員罷斥殊屬失之輕縱汪耀奎實型均著卽行革職永不敘用並從重發往新疆充當苦差由愛仁飭交該地方官迅速起解以示懲儆○諭議政王軍機大臣等愛仁奏訊明汪耀奎竇型參款請予罷斥並請將張維義交熙麟等查辦各摺片汪耀奎奎被參攬捐分肥買送民女及竇型被參收受施鵬餽送並索取馬承恩銀兩各款雖經訊無實據惟該二員聲名狼藉久經著聞斷非無因僅予罷斥不足蔽辜本日已明降諭旨將該二員發往

新疆充當苦差矣張維義見在熙麟軍營帶兵既據愛仁查訊閻  
丕敏等與張維義並無軼轢之處著愛仁卽行交熙麟由該督就  
近查辦其閻丕敏李祝齡施鵬盧殿標四員見已由陝解晉經愛  
仁研訊已有端倪著卽確切根究務得實情毋稍輕縱愛仁俟閻  
丕敏等案審結後卽行來京將此諭令知之○庚午李鴻章奏劉  
銘傳於十一月初九日帶隊抵常州城北十五里之陳都橋其前  
營滾進距城四五里地方探視城外各門賊營林立人數甚眾劉  
銘傳督軍由羊頭橋間道深入而圩塘賊營三座適包我軍之後  
幸屢戰皆捷飭駱國忠兩營暫紮西施橋扼其竄路張桂芳等滾  
紮孫村距城僅隔一河徐得勝者貴兩營紮過河西卽有常州西  
路奔牛鎮石城賊酋邵小雙率眾二千乞降劉銘傳卽令駐守該  
處堵擊丹陽援賊李鶴章派周盛波張樹聲兩軍於初七八日由

無錫進紮戚墅堰初九日周盛波進抵常州城東十五里之插鼓橋張樹聲攻奪白家橋賊卡十一日卽派兩營進紮白家橋周盛波哨至東門三里橋攻破賊卡一座逆眾萬餘由西南兩路來撲我軍鏖戰良久斃賊甚多賊退入營十三日各營出隊先搭浮橋數道並築長卡陸續滾進李鶴章已將無錫城守布置就緒馳赴常州督勦十四日劉銘傳督所部進攻西北門外各營一面飭令唐殿魁等環攻圩塘之賊該逆抵死拒守我軍以礮轟坍營牆各勇拔椿踰濠一擁而入先破賊壘三座擒斬無數城賊二三萬盡擁出救劉銘傳督隊分投迎勦力戰兩時賊敗退入城劉銘傳乘勝攻擊連破東北門外賊營十數座收降卒一萬五六千人十五日李鶴章飭周盛波等於五鼓出隊進攻東門賊營連破石營數座擒斬數千我軍入據其壘與劉銘傳各營一氣聯絡又會攻小

北門口大石營劉銘傳正用千里鏡測望礮路被賊洋槍子中傷頂額登時暈倒幸入骨未深子已取出午刻僞護王陳坤書率眾數萬出南門繞撲周盛波營後我軍大隊撤過河南張兩翼迎戰逾時賊乃潰走乘勢追過西門大河檢斬溺斃數千人破南門石營兩座臣查護逆一股久踞常州人數雖眾不甚耐戰前此疊援江陰無錫經劉銘傳屢次擊敗又值蘇錫克復軍氣愈奮賊膽愈虛祇以城堅池深各門外多紮堅壘爲死拒待援之計茲劉銘傳李鶴章等乘其衰蹙神速猛進勦撫兼施克賊營二十餘座收降二萬餘人城外已就肅清丹陽宜興來援各路亦經紮斷該逆似難久踞臣已函屬劉銘傳加意調治裹創督戰並飭李鶴章設謀招撫仍督隊速攻以期早克名城再浦東一路自劉秉璋攻克張涇匪賊壘平湖賊酋陳恩榮赴潘鼎新營中乞降初八日已率眾

薙髮獻城當將平湖縣城收復官軍旋入協守乍浦嘉善賊酋亦紛紛具稟投誠臣飭劉秉璋潘鼎新相機察辦俟措置就緒再行纓晰陳明程學啟卽日拔隊進攻平望與劉秉璋等隨時會商辦理上諭議政王軍機大臣等常州逆匪堅守待援經李鶴章等分路進攻連克賊營二十餘座收降二萬餘人丹陽宜興來援各路亦經紮斷該逆諒難久踞卽著飭令李鶴章等迅速圍攻力拔堅城毋令護逆乘閒免脫劉銘傳督隊受傷殊堪廑念該撫卽傳諭該員加意調治仍一面裹創督戰以竟全功降眾二萬餘人必須妥爲安置投誠賊酋邵小雙見經派令駐守奔牛鎮石城一帶堵擊丹陽援賊是否可靠仍當隨時察看毋稍大意另片奏收復平湖縣城並乍浦嘉善賊酋亦具稟投誠等語著卽飭令劉秉璋等相機妥辦如措置就緒卽行詳細馳奏將此由六百里各諭令

知之○諭唐訓方奏親歷下蔡壽正等處查看派兵駐守並統籌善後一摺張之萬奏苗捻餘黨羣趨汝南與土匪合股毛昶熙移軍督剿張曜一軍擊敗板橋川賊匪見飛飭葛承霖等助剿各摺片毛昶熙前有旨令其回京供職見在陳大濬等股句合苗黨有馬步五千餘人由岳城一帶南竄談家園並攻陷正陽之袁寨等處信陽境內龍井洋河等寨均有賊蹤勢甚猖獗毛昶熙以汝事日亟擬拔隊南征著將宋防諸事妥爲經畫卽日親督邵春仁勇隊進紮陳州一面親赴汝甯前敵督飭諸軍迅圖掃蕩張之萬派出之王玉佩等營並歸毛昶熙調遣該侍郎卽將此股賊匪迅速剿除再行回京供職板橋川之匪驟撲臥龍岡營壘仍圖西竄與藍逆句合葛承霖蔣希夷各隊均已赴宛僧格林沁亦撥蘇克金等馬隊助剿張之萬懷遵前旨移營前進督飭張曜等力圖剿辦

務將張總愚一股以精銳步隊偪之出險俾蘇克金馬隊利於馳擊方能悉數撲滅僧格林沁已將皖境各捻及苗逆餘黨辦有頭緒未盡事宜可移交唐訓方妥籌辦理該大臣酌度情形如可移營赴豫卽擇適中之地駐紮以資策應或添撥兵勇派得力將弁帶赴板橋川會剿責令剋日蒞事以免再有句結唐訓方所奏派兵駐守以期永遠肅清各情均中窾要至皖北地方遼闊人情强悍寇盜易滋如有應行添設重鎮及改設州縣藉資控扼之處著與僧格林沁面商並咨會曾國藩妥籌具奏將來僧格林沁帶兵赴豫唐訓方有地方之責無可推諉著懷遵疊次寄諭悉心妥辦毋令一夫失所以副朝廷委任之意將此由六百里各諭令知之○惲世臨奏請停湖南撫提標等營兵額各數成候軍務告竣以勇丁挑補從之○前任陝甘總督易棠卒于祭葬○辛未諭內閣

寶鋆奏太監出言無狀請旨嚴懲一摺尙書寶鋆於本月二十七日  
前赴壽莊和碩公主府內照料該府首領太監張玉蒼輒因上  
駟院羸馬不佳意圖挑換向寶鋆出言無狀並有傳令該大臣親  
身排車之語倚勢作威凌辱朝廷大臣實屬膽大妄爲殊出情理  
之外若不嚴行懲辦將來各處太監紛紛效尤流弊何所底止此  
風斷不可長張玉蒼著卽革去首領太監交慎刑司嚴行審訊按  
律定擬具奏○諭議政王軍機大臣等景綸奏擒獲巨盜審明正  
法一摺盜匪滾地雷王五自咸豐十年間卽在朝陽與白凌阿才  
寶善等恃眾搶劫到處焚掠本年由昌圖廳竄至靠山屯分股逃  
竄以圖牽掣官兵經通判松鶴督帶練役追至狝壯溝將該犯拏  
獲地方可冀漸就肅清惟白凌阿才寶善尙在逃未獲且此次首  
盜王五餘黨尙夥若不趕緊搜捕淨盡終恐餘孽復萌仍著景綸



等督飭在事文武員弁務將白凌阿才寶善迅速拏獲並搜捕王五夥黨餘匪以期淨絕根株將此由五百里諭令知之○諭王憲奏邊陲地方緊要請將隴西縣丞仍改爲漳縣知縣一摺甘肅鞏昌府屬之漳縣於道光九年改爲隴西鄉設立縣丞歸併隴西縣管轄原爲因時制宜起見茲據王憲奏稱漳邑原設縣治距隴西七十里西南接洮州岷州東南接岷州甯遠延袤三百餘里毗連皆係邊要地方遼闊自裁併隴西改設縣丞後書役刁詐盜賊出沒土棍強橫有非縣丞所能治理且該處舊有鹽井課項攸關甘省回逆俶擾河州狄道等處均與漳邑舊治相去非遠尤非縣丞所能籌辦各等語隴西界連邊徼復近回氛練勇籌防在在均關緊要該藩司籍隸漳縣於該處地勢情形所籌尙爲明晰見值滿日兵燹地方彫敝之際所有改官定制苟於時事有裨不妨量爲

變通著熙麟於到省後詳察情形妥議章程具奏固不必徒事紛更亦毋庸拘泥成例總期斟酌盡善經久可行方爲妥協原摺著鈔給閱看將此諭令知之○諭滿慶等奏縷陳藏務情形請准糧員寬限赴京又藏中因防範奸細修砌牆垣廊爾喀願助唐古特防勦瞻逆夷匪搶去報匣佛匣見在飭緝請畱丁憂之拉里糧員差委請催查辦藏務大臣遞解喀徵呼圖克圖來藏各摺片並鈔錄斷牌照譯藏格巴都爾夷信及檄文底彙呈覽覽奏不勝詫異李玉圃一員疊經有旨令其迅速來京與喀徵質對而滿慶等乃欲將喀徵解藏質對請將李玉圃畱藏備質且以該糧員經手那匯帳目接濟兵食藉詞挾制李玉圃若不來京要案何能訊出著懷遵疊次寄諭仍飭李玉圃迅速來京毋得再涉遷延致干重咎藏中因防範奸細修砌牆垣見將官兵移紮正街向來駐藏大臣

衙署建蓋城外當日必有深意滿慶等何以欲移城內卽有不法  
番民來藏句結何至不能嚴拏懲辦豈移居城內遂可爲藏身之  
固耶此等辦法殊不可解廓爾喀願助唐古特防勦瞻逆該大臣  
等將其大小礮位鉛藥借用已令四川總督酌撥價銀惟滿慶等  
摺內既有廓爾喀素性狡詐之語此次因其致信來藏輒行借用  
礮位等件但恐將來需索無厭亦須妥爲防範以弭嫌隙夷匪將  
報匣佛匣搶去著卽督飭江有福迅速帶兵嚴拏已諭令駱秉章  
派兵清理驛路及時整頓以免文報阻滯丁憂之拉里糧員陳廷  
傑著准其暫畱幫辦防堵事務俟瞻對事竣卽飭回籍守制福濟  
等赴藏遲延已經嚴旨申飭並催令剋日前進滿慶恩慶惟當就  
見在情形妥爲辦理並派兵弁疏通道路俾福濟等早日抵藏以  
息爭端將此由五百里諭令知之○諭前因滿慶恩慶奏歷陳喀

微捏具寃詞聲明原案始末等情當諭令福濟景紋趕緊赴藏不准再事耽延迄今月餘尙未據福濟等奏報啟程實屬不知緩急本日復據滿慶等縷陳近日臺藏情形並達賴喇嘛以商屬僧眾日盼欽差來藏查辦事件咨請代奏請飭催福濟等兼程前來察看臺站及藏中情形如所奏事情一有虛偽從重治罪等語福濟等一日不到藏地藏眾卽一日不安滿慶等轉得與汪曲結布互相勾結朋比爲奸福濟等久已奉命赴藏尙待滿慶等及達賴喇嘛再三奏請催令前來已屬不成事體著福濟景紋迅卽遵照前旨星馳前進如再自耽安逸託故不前則是昧良喪心萬難寬宥豈謂朝廷不能執法從事耶福濟等其懷之將徵前已病故滿慶等佯爲不知請押解來藏質對殊屬狡詐已嚴飭滿慶等仍令李玉圃迅速赴京丁憂之拉里糧員陳廷傑已准滿慶等暫畱差委

仍著駱秉章選派妥員接管糧務及乍察防堵事宜俾李玉圃得以交卸啟程不至藉詞狡展並著駱秉章商同崇實另派明幹員弁隨同福濟等赴藏審辦一切案件較爲有益駐藏大臣衙署向在城外茲據滿慶等奏因藏中防範奸細修砌牆垣遂將官兵移紮正街並該大臣等亦移居商上官房殊出情理之外是否滿慶等被汪曲結布挾持一切不能自主崇實駱秉章必有所聞卽著據實詳奏並著福濟景紋於到藏後將衙門因何遷徙之處一併查明具奏瞻對夷匪擾及站路關繫甚大不可不調兵勦辦據滿慶等奏稱西俄洛塘兵李宗勝接遞報匣佛匣行至麻格宗三道橋地方被崇喜土司之弟任爭格納搶去有無別情是否屬實著駱秉章查明辦理並著恪遵前旨挑派得力兵勇前往瞻對將滋擾逆夷痛加勦務令驛路疏通附近土司各安生業以副朝廷撫

綏遠方至意至廓爾喀願助唐古特防剿瞻逆一節業經滿慶等  
婉詞拒絕惟見已借用該國大小礮位鉛藥不可不酌給價銀以  
免異日藉口著駱秉章咨行滿慶等將廓爾喀所開礮位鉛藥價  
值清單照數撥給銀兩以敦和好而示大方福濟等務當明示羈  
縻密加防範毋得稍涉大意崇實本由駐藏大臣改任將軍藏事  
敗壞至此該將軍亟須商同駱秉章福濟景紋設法辦理如福濟  
景紋辦理不能妥協惟有仍令崇實前往斷不准該將軍卸責也  
原摺片六件並斷牌信函檄諭共四件均著鈔給崇實等閱看將  
此由五百里各諭令知之○壬申諭議政王軍機大臣等正白旗  
滿洲奏副參領恆稔呈訴苗練仇殺案內副將被戕冤抑一摺據  
稱咸豐十年間安徽壽州逆練苗沛霖因副將徐立壯不肯從逆  
將其家屬誘執全行殺害徐立壯因勒所部與苗逆相尋仇殺嗣

因團長孫家泰攻殺苗逆黨與七人苗逆挾恨圍逼壽州勢甚危迫當事者竟將徐立壯正法孫家泰監禁冀安反側該副將全家被害復以一身抵償雖云覺起私仇實由不肯從逆所致請飭會國藩等查明覆奏等語苗沛霖已正刑誅其從前與苗逆爲仇如該副參領所呈徐立壯孫家泰等不甘從逆卽屬義民乃竟駢首就戮並恐有地方官冀安苗逆反側故置之死地者亟宜確切查明俾死者不至含冤於地下徐立壯等被殺有無冤抑其時該地方官等辦理有無謬誤著僧格林沁會國藩唐訓方查明據實奏聞不准因已往之事稍涉遷就此外壽州等處官紳團眾與苗練爲難被害冤抑者尙不乏人如黃鳴鐸蒙時中等案詳細情形及起釁根由黃鳴鐸見在下落均著一併查明具奏將此各諭令知之○諭都興阿奏嚴防北岸並稽察北渡情形一摺蘇城賊口部

雲官等既經伏誅所有散遣降眾二十餘萬人數過多前經李鴻章奏明分別給賞散遣回籍惟是否由江南岸陸路行走抑有兩湖江安等處之人由江面水陸行走及渡江北歸者著李鴻章查明轉飭滬軍及淮揚水師將渡江降眾分起撥船上送如係江安及儀揚附近之人均由儀徵登岸以便稽察遣散其兩湖安徽等處之人卽由淮揚水師查明撥船順江上送以免驚擾裏下河完善腹地毋稍疏忽見在南岸各州縣大半克復該降眾有籍隸南岸各州縣及該處難民人等如有地方可以安插卽可無須分飭渡江所有前畱濟渡難民之六圩港口卽由都興阿富明阿暫時封禁以防奸匪潛迹此後如須有仍前設渡之處應由李鴻章隨時察看情形與都興阿富明阿會商奏明辦理此時南岸軍務得手北岸防堵尤宜格外加嚴著都興阿等將儀徵渡口妥爲防範



其下游泰興陸路一帶卽著飭令派出之副將劉成元督兵駐守認真堵禦並飭侍衛訥依楞阿於沿江一帶嚴密探防仍督令吳全美等水師將沿江各口岸節節布置不准以空言敷衍了事將此由五百里各諭令知之○飭山西迅撥銀二萬兩濟西安旗營兵糈○是月蠲免山東泗水等八十二州縣被災被擾新舊錢糧直隸武清等二十一州縣被災額賦並旗租倉穀賑吉林打牲烏拉被災旗丁並展緩額徵穀石